

筱竹遺墨光緒

三十二年丙午正月之

四月四日止

三十三年丁未正月之五月半止



市州遺

願宜茨室日記八冊

00224

頌宜茨室日記

筱竹林

正月元日己巳晴早起焚香盥手讀周易

讀百趙羽儀妹丈李彬臣表兄陳丹卿表弟均

年午刻整衣冠謁竹崖公祠定例以元旦設饌祭祖分

糕橘與子姓敦古處也祭畢享饌席帶往諸中表家

道賀宵閱素隨日詩話

二日庚午晴往各親友處道賀李祥菊玉君二昆仲

來賀年宵試筆成二十八字

新正二日試筆

韶華迅速似飄塵爆竹聲中改歲新題得紅箋廿八

字筆花先占管城春

三日辛未陰王浦東義兒初來拜見家乃容侄宋子樞門人接踵來道賀連日雙目患熱看書頗不如意

四日壬申陰鄭君一山攜其子閱樽來賀年李鴻鏘至宸兩內侄暨黃慶潤門人接踵而至宵在李玉君表弟家飲圓真酒是日內子生日諸義兒家饋麵桃來祝頗豐

五日癸酉晴李漱芳內弟蔡作醴管黼夔黼同黼堂諸門人均來賀年宵演算

六日甲戌晴李友樞內弟以岳父生辰邀余往其家飲圓真酒葉雲村家穆仙均在席申刻姓子瑛宋子樞二門人過訪宵演算

七日乙亥雨補鈔高季迪詩缺本家藏舊本缺卷三四共三卷余壬寅設館孫學士止園先生家見此本假歸欲為補缺無如癸歲為西北蒙學教習課無暇晷甲乙兩載亦任教育之責代人作嫁歲月蹉跎事閱五年依然篋幸乘此暇思逐日補抄而還之云薄暮苦雨成七古一章

人日

駒隙光陰比箭疾新年忽忽逢今日當簷雨溜挂如

繩終朝癡坐讀書室門無剝啄客不來耳聽庭葉戰
蕭瑟人生休誤少年時春風消息透花枝莫言此日
少佳勝題向草堂續舊詩

八日丙子雨雷始發聲終日抄青邱詩宋子樞過訪
宵演算

九日丁丑朝雨夕霽抄高青邱詩缺幅終日宵閱隨
園詩話

十日戊寅雨福潤局送到日報雨窗悶坐百感交備
成傷今七絕八章戴正泮門人來訪

雨窗納悶有感

紛紛邪說甚洪流革命倡言效美歐記得宣尼麟史
筆春全正月為尊周滿朝植黨際熙豐冰炭當年

兩不同佐政率皆貪黷輩為嗤新法創荆公王楊

盧駱皆浮躁聖世需才重老成今日朝廷喜年少野

蠻空自說文明爛熟羊頭關內侯中郎竈下擁貂

裘年來官爵太輕賤如此功名羞不羞納粟加官

漢濫觴朝披短褐夕絲韁明珠魚目真難辨仕路今開

太市場科名已廢蓄真才爭說中華學界開樹木

樹人同積久工夫豈是速成來夏變於夷偽亂真

中邦文物歎沈淪伊川非復神州土野祭都為被髮

人慷慨揮戈稱俠豪頭顱飲血表勲勞英雄有意爭
名利終讓巖光釣隱高

十一日己卯晴攜樽桐兩兒登集雲山省曾王父祖父
母暨先府君諸墓是夜月明如晝丑刻交春燒樟葉
飲春茶遣人送糖果與諸義兒觀我朶頤分甘示惠循
舊俗也鄭一山親家以會吉通書投贈俗名憲書為萬
年書山兄報我殆取斯義以寓永吉之意歟趙羽儀妹
丈步月來談甚久

十二日庚辰晴立春節成七言一律抄青邱詩趙羽儀
妹丈過舍暢談良久

立春日偶成

容易流光似轉輪土牛迎暖遍郊圍當鑪樟葉初燒

火

俗立春家家燒樟葉謂之炆春

隔屋梅花早放春

十三日辛巳陰抄青邱詩申刻仲妹遣人送蠟梅數枝
來置諸膽瓶清香撲鼻靜坐斗室頗得禪悅之味張
震軒妹丈攜毓窩義兒駕舟自丁田來賀年暮雨
邀李麗生趙羽儀二妹丈全飲留軒兄宿

十四日壬午晴張震軒妹丈暨馮甥返舟歸丁田

周君曉秋來謂宋子樞擬入杭州陸軍小學校須向
溫郡學務處備齊冊結直接武林聞池君仲鱗之門
人亦欲赴考遂冒雨往訪托其合辦以免一番轉折
也遇之見允宵閱隨園詩話

十五日癸未雨抄高青邱詩宋子樞門人來辭行謂
今晚束裝動身為備墨銀一圓作七言二律遣樽兒送
贈以壯其行宵初天開霽色蟾月一輪朦朧在淡霧中
如隔簾之佳人頗形嫵媚過李玉君表弟家一談
附錄宋生志俠遊學武林擬入陸軍小學校即以

送別

春江水綠送輕舟千里雲山賦壯游年少從軍懷鄧
禹書生投筆學班侯雄心直欲摩三島豪氣真看壓
九州此去鵬程高展翼橫磨長劍定安劉 英雄
事業比風雷不建奇勳志不灰中土文明龍德曜列
強爭逐鹿場開豐城已奪斗牛氣天廐都收騏驥材
愛爾春華須努力仁者姓氏署雲臺

十六日甲申陰朝往珂鳴社收買字紙此期係余值收

申刻月食階趙羽儀李麗生

二君買舟往丁田賀年近

暮抵震軒妹丈家夜雨

十七日乙酉終日悶雨在戲隱園踏李麗生趙羽儀張

震軒三妹丈寓甥擲骰子俗名奪標圖交相爭勝精神振刷都存先鞭我着之心宵則繼之以燭

十八日丙戌余與趙李二君倦有歸意為雨所阻仍在戲隱園作骰子戲以解悶懷寓甥屢擲頗出色宵借震軒兄坐論算術

十九日丁亥朝陰全趙李二君買舟而返便過董田恒春酒肆訪周小泉表弟談頃別歸午刻抵家福潤句送

到日報夕雨抄高青邱詩宵初孫公俠門人遣伴來假諫垣奏議李維樾著家藏抄本甌乘拾遺洪守一編輯法幢禪師明州大梅

山語錄先宮詹公當有明鼎革後隱跡緇流行幟其別號也主席明州大梅密印諸寺參透禪理凡有所言隨筆手錄故成是編末附公傳詳

譜所畧得之品蓮詩僧也共三冊

二十日戊子雨西北初等學堂開課余居司事之列隨

同人而行修謁師禮計教習五人包小亭作雨史學項

獎玖張翼臣鴻胡經學周眉仙之冕專教蒙

養沈體操已刻往胡家為桂第表甥發蒙

午刻設筵款余宵邀趙羽儀妹丈樽兒隨之全往董星

珊光第家飲拱瑞山眾福首酒更闌過李彬臣表兄家

一談

廿一日己丑雨抄高青邱詩劉玉樵來謂李玉君表兄弟

廿二日庚寅雨抄高青邱詩

昨宵在金眉孫家犯賭為莊典史邏獲羈留在署茫然
聞之過其家詢問所言皆實余為不平者久之夫賭博一
事誤人非淺犯此者俾晝作夜耗削精神一擲千金揮霍
如土品行由此墮財產由此傾目見浮浪子弟坐席祖業
未閱一年而田舍蕩然甚至囊金告罄鬻子賣妻踽踽
獨行無家可托饑寒交迫鵠面垢形以乞丐自居實為
人類所不齒身既至此後悔奚追今日賭風最盛無論
士農以及工商被其迷者十居八九不思建樹慢遊是好
日作無益坐廢居諸中國衰危皆由若輩以致之也有
官守之責者力為厲禁以身先之頽風可挽其庶幾乎

不然官疲民情風俗日偷國本已虧桑榆莫挽惟有與
之俱亡而已彼莊典史羈押玉君以示罰而不畏宵行
儆一可以懲百大局已明季孫行父所謂於舜之功二十
之一者莊令有焉苟直省之民牧均能效莊典史心履
鼓勵以厚民風進化有機豈不美哉

廿三日辛卯朝陰抄高青邱詩申刻雨各都地保來
署點卯以舊歲耆民照費尚有尾欠往縣署候而討之
過楊仁大紙舖購來歐洲十一國游記一冊著者康有為
筆法簡老如讀南華宜玩之不置

廿四日壬辰雨抄高青邱詩宵演算

廿五日癸巳雨抄高青邱詩宵往捕署與李玉君表
弟一談

廿六日甲午雨先君忌日雨水節求是學塾開館受
業者黃啟元李慶瀏乃文泮文鴻文洪文曾昭仁徐益芬
李渙文樸兒共十人出題考甄別定甲乙班次宵初李
蔚文表侄東裝赴杭擬入陸軍小學校往其家送行
廿七日乙未雨在館定課程表改丁期為來復以符各
學堂授課日期體例其表如右

甲 一 上午 下午

乙 一 上午 下午

二

二

三

三

四

四

五

五

六 溫積熟 作文

六 溫積熟 作文

來復

來復

廿八日丙申雨到館福潤局寄到日報郵局遞到宋子
樞上海寄函葉耕經送來第三年新民叢報第二十三
冊原第七十一號附贈德育鑑一冊此書係梁任公所編
輯分辨術立志知本存養省克五大綱採拾前賢論學

精語逐節下一案語立辭警鍊洵為有用之書置諸案頭時勤披覽修身克己獲益不淺

廿九日丁酉雨到館

二月朔日戊戌雨到館率諸生謁聖寫文帝誕祭齋戒三日榜諭樽兒寫頌胙票

二日己亥到館出文課終日霽雨家藏名賢手札為屋漏所侵幸早知覺被濕者惟十之二遂備火鑪烘之雨勢極大有如傾盆天壓近簷沉黑不辨溜水滴下若漏壺之丁東詩云牀牀屋漏無乾處信然宵寫祭文昌祝文是夜五鼓致祀余家值辦遣樽兒排列豆品候

官僚同祭

三日庚子終日霽雨沉悶不堪來復不到館抄高季迪詩

四日辛丑陰到館午刻抄高青邱詩宵趙羽儀妹丈約李穉菊與余公稟捕主擔保玉君出押竟為王夔拊所阻心頗憾之

五日壬寅晴早起抄高青邱詩旋到館改乙班課

六日癸卯晴早起抄高季迪詩旋到館改甲班課

七日甲辰晴到館午刻抄高青邱詩一頁

八日乙巳晴到館午刻抄高青邱詩一頁

九日丙午晴到館出文課題福潤局遞到日報葉更
今送到第三年新民叢報二十四號原七十二冊

十日丁未晴為丁星會合之期到館率諸生謁聖散
學休息聞劉菊仙自鄂來省母余與劉君為卅角交復
訂蘭譜最為莫逆辛丑之歲借黃赤頌觀察赴鄂黃任
鹽政菊仙依之為幕駐足七稔頗有蓄積由廩成均納
粟捐職以分發知縣用今日衣錦言旋省親叙舊何快
如之以駿無能徒以書籍耽心終日呶唔依然故我彼
此相較奚啻天淵自撫厥躬多所滋愧然盟同車笠
何論富貧俟暇過訪樂為之叙契濶焉宵過李玉君

表弟家因渠是日出押故往探問且進規勸之箴以作
後來之戒

十一日戊申晴到館午刻抄高青邱詩一頁薄暮訪
洪蓉軒袖摺扇索畫以受羽儀之囑也

十二日己酉晴驚蟄邀巧人修葺書舍謂罅漏之處插
瓦太重水壅不流且重而平故有此患善鋪瓦者貴輕
不貴重貴峻不貴平疏密相間曲折適宜始為得之噫
匠者之言洵確論也即小見大由淺觀深行文之道何獨
不然到館授課宵與趙羽儀妹丈坐談良久
十三日庚戌晴辰起抄高青邱詩二頁到館宵演筭

與羽儀坐話

十四日辛亥晴到館長妹偕成寧二甥泛舟自丁田至午刻李雲苓管仲凌二君合設酒饌延劉菊仙小飲招予陪席在座者李漱梅孝廉王小博明經蔣仲笙國學申刻仍赴館洪蓉軒過訪袖還畫扇并假去墨銀二圓宵挑燈演算因數未熟心思頗苦自姚生子琪不及門無人指點或作或輟大壞功修

十五日壬子天早疎雨旋陰到館率諸生謁聖始授課宵晴月明如晝全趙羽儀李麗生二妹丈李祥菊表弟往東山觀燈人來人往熱鬧異常所製之燈或花卉或人物形容畢肖當此紙醉金迷之地觀之頓忘倦也至夜半而返

十六日癸丑朝陰夕雨到館課諸生溫積熟并出文題宵月明如晝族長成良公暨毓卿增楠桐昌來羣議邀余作呈詞投縣斥逐楊氏 查楊氏平陽林岱人

為某姓之妻錦姆之母夫故家貧乞食度日未幾至瑞代人澣衣嫖母其形無鹽其狀而楊花水性固其素心族兄立桂駝背廢疾晚年未婚蓄有家田足以自贍但恨井臼躬操無人扶助楊氏日往來其門彼貪其饒此樂其寡一時撮合遂成為野鴛鴦楊氏悍潑成性桂反為其所制

欺桂廢疾利桂積貲串同前夫之子私將林乾發戶數十畝田變賣于王嘯牧大令家實得價英銀六百餘元侵蝕者半花消者半桂心知之實無如何也先是楊氏依桂未久抱來小沙堤某姓之子以作螟蛉閱五歲而天續又于桂亡之前一月抱東山某姓子認為養子以為後日長成爭繼輪值張本光緒二十六年某日桂得宿疾身故未殯之夕同房之煥卿桐昌往其家理論謂繼桂者為煥卿之子乃緯兩相爭執彼此不允南門之房長靜山從中豔賄首鼠兩端邀同兩造冒立合同執據載明煥卿子乃緯例應祧繼分田二畝零作披麻執杖之用楊之養子既受

收養亦當析產安頓所有林泗埕字號田二畝零及桂生前所築之屋均交與伊食用至入席輪衆宜歸一例又以桐昌代理喪事拔坑舍一所聊酬其勞其次煥誥亦得染指惟前被族父林子韶盜賣三畝有奇之祖田係桂贖回撥歸大小宗為上坟辦祭之用靜山暗中播弄分三分之一歸己以飽私囊據字草率啓厥爭端實由不肖之靜山釀成之也客歲靜山病沒楊氏與煥卿桐昌二人口角又聽比鄰劉莼村明經挑唆把持立據備呈控卿與昌張邑尊嚴明一再不准旋串同地保曹玉鏘捏誣稟准屢次飭差查覆協理因卿昌二子不諳事理姑妄聽之遂

致養癰成患疊架呈詞而煥卿之弟毓卿更不識案情
冒倩楊竹坪捉筆具剖天然湊合以偽為真邑令批提
質訊所失又在此也今日族中伯叔聞之不平羣來余家
商酌乞余臂助蓋恐一誤之後復遭再誤壞茲大局悔
何可追共議斥逐之策以免異姓而亂吾宗此則族眾之
心也嗟乎以一乞丐之婦人挾假子而妄控以一不肖之房長
貪濃賄而敗謀蔑祖亂宗厥罪惟均吾輩讀聖賢書
所學何事數典忘祖其可乎屏逐之責余烏敢辭古人
云非其種者鋤而去之為朱虛侯亦自盡其天職而已
不然稍加回護決非令子與眾立誓鳴鼓而攻豈為過
乎

是日上午往珂鳴社收買字紙得紅藕山莊尺牘殘
本共九冊缺首卷而著者姓氏未詳俟異日再攷

十七日甲寅晴來復休息抄高季迪詩五頁宵過桐
昌家一談歸寫祭關帝祝文

十八日乙卯晴到館授課作控陳慶瀛盜葬呈詞邀
族人增楠投遞宵葉味蘭過談

十九日丙辰朝晴夕雨到館福潤局送到日報一束

二十日丁巳晴到館改甲乙班課宵學算至命分諸
等之化聚

廿一日戊午晴到館午刻抄高青邱詩四頁宵學算
廿二日己未晴到館改丙班課抄高青邱詩二頁宵作
斥逐楊氏呈詞而未脫稿

廿三日庚申晨晴旋陰到館出文課題為合族攻斥楊
氏足成昨宵所構呈詞言頗中肯內有數字未合賴趙
羽儀妹丈潤色之

查大宗族譜立桂與煥卿並出慶哲派下慶哲生三
子長春年次華年三逢年煥卿為錦澹繼子而錦澹出
自逢年桂為錦深之子其祖高哲無出以兄慶哲之次
子華年為嗣華年生錦深錦深生立桂雖分兩房實

一家也桂無子又以煥卿子乃緯為嗣循分使然至
桂年老不娶譜系分明且譜光緒十二年重脩桂猶
在世並非遺佚楊氏冒為正妻以假子為真嫡宗支淆
亂豁然可明為林氏子孫力為正本清源其可也防
微杜漸有鑒於斯

附錄

斥逐呈詞 為亂宗冒族有玷血支僉請恩賜作主
嚴懲斥退以清宗派事竊生等祖居本邑為濟南氏族俗
稱南門林自始祖元章公由閩遷瑞計二十五世自宋至今
歷千餘年族衍支繁一脈相傳從無瀆姓大宗分派魚塘
河滙成試竹崖共四房而竹崖房又分四派茲緣竹崖公

派下之侄孫立桂即立貴駝背廢疾晚年未娶突有平陽
林岱地方之丐婦楊氏即錦姆之母當時因夫故後往來
丐食時常代桂澣衣豔桂積產引誘百端烈火乾柴勢
所必焚桂在日曾抱本城大沙巷陶姓之子五歲而天繼
於桂亡之前數月又抱東山下埠地方嬰孩取名姆兒認
為己子然按圖立後應以煥卿之子阿緯承繼奈桂房之
前房長林靜山年老昏耄竟存私見不顧混派姑息宕
延事隔六年養癰成患刻因楊氏挾有假子欲輪流大
小宗祀田聳詞誣控賄地保曹玉鏘校串朦稟上瀆憲
聞竊思楊氏係乞丐寡婦誘桂苟合來歷既已不明養

異姓嬰兒覬覦眾產居心更不可問生等忝居族長推
本窮源何堪坐視苟聽其混亂弄假成真由小宗而及
大宗由入席而列譜系亂宗之漸由我而開千載譜圖
定污蠅點勢必受子姓譏彈被後人唾罵惴惴滋懼
責何能逃非種必鋤古人深戒如蒙 仁憲嚴加斥
退端本清源合族感德迫此僉叩伏乞 老公祖恩
賜作主嚴懲潑丐立加斥退以清宗譜以正血支公侯萬
代上呈

廿四日辛酉晴天氣燥熱來復休息抄高青邱詩
二頁成詠水仙七言四律

水僊花

獨抱孤芳自古今玲瓏不受俗塵侵亭亭洛女凌波影脈脈江妃解珮心身擅仙才融玉骨歌成水調撫瑤琴最難清伴幽人夢睡鴨香溫到夜深 冰霜鍊格月傳神吹氣如蘭最可人獨立依然高潔士此生休負歲寒身劇憐萍絮茫無主自惜芳華不怨春願效米顛來拜石數奉白石倚為鄰 香草美人寄所思豈同蘭怨託微詞前生本是天家種出世應超國色姿秋水神凝原不俗冬心冷抱有誰知湘江洄溯情無限明月清風入夜時 淡到無言思悄悄

然自全真性洗華妍裁雲鏤雪非凡質勺水拳山小有天斗室生春留逸韻瑤臺降謫始何年羣芳爭寵終銷歇清氣惟君占獨先
廿五日子戌朝雨夕晴天氣溫暖到館趙羽儀妹丈來談

廿六日癸亥晴天氣溫暖上午到館下午至宮啓公祠為侄乃奴指斥德真煥卿桐昌三人盜賣祀產投呈已三次矣余以骨肉構譽同室操戈事之不祥莫甚于此故邀集族人設席祭祖以調息之宵李

楷來

舍坐談甚久

查南祀戶田額高吞四畝三角山坑四畝五角鐘山并江
頭四畝五角新啟一畝六分銅乾五畝埤坑十一畝外桐
二畝五分南祀房長煥卿暨德萬桐昌擅將高舉鍾
山江頭新啟等田出賣共得英銀一千二百餘元後恐
族衆問罪轉買吳橋新田若干畝付出英洋六百一十
元又憑中出入戶號及飯食行舡諸項費用計花消英
洋乙百二十餘元合成公用計七百三十餘元其餘存銀三
人均坐分肥飽填欲壑乃奴為林府房中一分子憤其
私賣祖田暗中逐利備呈控告職是故耳

廿七日甲子春分朝雨旋陰到館改乙丙課卷午刻抄

高季迪詩二頁宵演祿

廿八日乙丑陰到館宵過趙羽儀妹丈家因渠受唐亦
玉大令之招將赴汴梁行旌在即故與暢談以伸雅意
廿九日丙寅雨旋晴到館改甲班課薄暮趙羽儀妹丈
束裝告別與其戚黃堯如同行余往其家少叙送至河
干而返

晦日丁卯陰朝到館出文課題夕設會席于飛雲閣

在坐者葉耕經雲村昆仲家毓卿李麗生郭仲裳

代吳暨余共六人而葉壽如孫中愷李彬臣不至此期

收會資歸諸愷兄席散已近暮矣抄高季迪詩畢功

門人孫季芄送來國粹學報計十三本宵雷雨終夜

三月朔日戊辰雨來復日到館謁聖散學子休息郵局

遞到河南唐赤玉大令書

內附滙票二紙

作復書過季芄家

一談袖還青邱詩復假來慎江文徵計三本甌括先正文
錄一冊 慎江文徵計六十卷為永嘉周天錫所編輯吾
鄉先正遺文蒐採得十之八先宮詹公有奏疏數道為諸
書所未載亦曾列入故假歸而錄之

西復唐

本日接到尊函及滙票二紙承委購採茶葉

理當助力前羽儀兄函與弟道及刻已徧囑本山主人俟
出茶時擇上品者罄其所有送到舍下屆期再作品選

也二十元之滙票須向溫郵親取待後數日上郡領來羽

儀暢如二兄均于二月廿九晚起程矣尊嫂夫人囑購花

洋布書包并天足鞋樣俟下躺輪舶到溫寄奉可也

二日己巳雨到館葉更今送到叢報第四年第一號福

潤局遞到日報午刻偕管杏浦丹三周曉秋榴仙眉仙

吳伯屏潘子璜姜嶽仙設饌祭奠李松岑先生李君

永嘉人寄居瑞安曾遊庠善謀貨殖內西北創辦惠民

倉與有力焉宵演算

三日庚午雨先大母生長到館宵姚炳魁黃啟元來

舍夜課

四日辛未雨往毅武女學校贈教一日本塾授課上午定以七勺鐘下午則以一勺鐘二十分此來彼往事獲兩全以免招芸人舍己之譏宵演算

毅武女學校在西北衛房宮為吳伯屏箇人創設計來學者五十人分甲乙丙丁四班女子年歲則以十齡以下為定例也

五日壬申雨朝到館夕張去令懸牌招楊氏暨煥卿桐昌到堂訊鞠余為族中一分子實難袖手旁觀隨同族房長到署備質俟至一更後未聞傳呼恨為私費所攔約以來朝

六日癸酉陰朝到館夕縣傳楊氏訊鞠余令族長往署備質張令謂乃桂一派譜系未載所娶楊氏必非正嫡無疑且譜係光緒十二年重修隔二十六年乃桂之亡中間僅十五載妻子不詳又非遺漏但楊婦既隨桂數年暫以舊日所居之屋暨二畝零之田作為養老而入席輪衆一節均不允許以免啓亂宗之端吁張邑尊明察秋毫片言折獄有仲由氏之遺風焉

七日甲戌朝陰夕晴到館改甲乙丙三班文課得趙羽儀妹丈漢上書暨宋子樞門人武林書本日為昨夕訊案私費未了差使屢來剝啄頗嫌騷擾然捐錢不交實

疏卿從中播弄以致之為鬼為蜮醜然而目實可惡也宵
初桐昌送到而開費始了往族長成良公家指疏卿之不
良揭其原由暢為之談夜歸挑燈學命分之諸等加減
八日乙亥大晴來復休息朝學命分之諸等加減午後
姚子琪過談申刻往東山見延颺姑母日晚強留予宿辭
歸宵月生暈過廣馨土藥肆與鮑佩琛楊禪田二老人
高談至夜半

九日丙子大晴到館作書覆宋生子樞郵寄杭省葉更
今送到新民叢報第二號黃啟元曾昭仁有事請假宵月
如晝身子困倦眠息甚早至夜深始起獨坐齋窗演算

良久

與宋生書

河梁話別屈指蟾圓已三度矣想

足下駐轡武林耳目所歷學力日增較之踰伏蓬門心
拘墨守得失奚止分毫三月上浣七日接到手書一覽之
餘知君急于止業皇皇汲汲已流露楮墨之間但近日各
處學堂創立如林雖有章程雖有名目亦不過敷衍鋪
張毫無實際或定一月而落成或定數月而招考熱心
入學者僕僕道途不憚修阻原冀稍得地步為後日吐
氣而揚眉奈各堂學務內容不修而外觀有耀苟當局
者一往直前而不審所擇非特招逃楊入墨之譏悔不能

及即虛糜多費獲益更難是在胸握智珠者自為主耳
足下前聞杭省開辦陸軍小學校欲附名肄業繼因辦
未歲事轉入練軍營復憚其煩擬另入武備速成科一為
速于畢業一為便于進身况一年之費雖需百金學成致用
反得十倍之償出谷遷喬高明之見鄙人深羨君之善自
為謀也得此消息即為叩府向令尊代言但令尊深嫌學
費數鉅力不能支且諉足下出門時勉強挪措獲數十
金續又寄付英番七八尊誠恐出路之人資資維艱內顧
不遑更為集腋今又變局三倍其數杯水車薪勢不兩
敵自恨家無積產薄留數畝硯田食不足一年錢亦入不

敷出惟藉紙業稍得微利聊以自贍怒形于色難措厥詞
雖為足下之故從旁慰解終無如何也足下當自量力
與其財力不及進退兩難不若靜以待時束裝回里少
紓親懷古人云慈母手中線遊子身上衣留將寸草心
報得三春暉為人子者不可不思倘足下寄栖異地定
罄囊金將伯誰呼黑貂告罄其奈之何是否酌裁為
要言下自家慈以次均平安毋勞遠注春風和煦化日舒
長手此佈覆順問近佳

十日丁丑晴到館夕往集雲山掃墓不上課張震軒妹
丈來宵月色如霜過李雲苓表弟家與禕菊坐談至

夜半

十一日戊寅晴到館十句三十分鐘往毅武女學校授甲班國文福潤局送到日報夕改三班課宵過楊仁大書庄購來算術教科書上卷一冊原著為澤藤利喜太郎譯者為泰興劉啓文張文廉二君算式明晰惟下卷未出版過姚子琪家一談

十二日己卯寒食節朝雨登集雲山謁九壇坎不果到館夕陰在族侄乃奴家飲土坎酒宵演算

十三日庚辰清明節朝陰夕雨是年大宗眾田為余值拔族長議定酒食之費折存以作訟款惟設一席以祭祖而銅乾族人不知其由均來赴席一時失措不及備饌恨無厚物心甚愧之

十四日辛巳朝雨夕晴代周榴仙作聯語贈管君杏浦為近日招股開放香山藥肆也宵演算

望日壬午大晴是日莊濟王出巡安方循俗例也出門散步半日

十六日癸未晴嫌前日聯語頗不愜意復改作之其語云以香為緣拾神農草與山同壽永韓康名

十七日甲申晴聞長女弟近日身患乳瘡邀李彬臣表兄泛舟往丁田探視至暮返權

十八日乙酉晴朝上萬松山掃墓

十九日丙戌朝陰夕雨得趙羽儀妹丈漢上寄函福潤局送到日報

二十日丁亥雨節假已過到館授課宵學算

廿一日戊子朝雨夕霽到館出文課題

廿二日己丑朝晴夕雷雨來復休息不到館閱日報宵演算更深雨止

廿三日庚寅朝大霧漫天到館暮雨孫公俠門人書來假閱新民叢報并謂其侄公權已東歸

廿四日辛卯陰雨到館過公俠家一談并假去叢報共五冊得昭顯寺品蓮和尚書附以和詩

廿五日壬辰朝雨夕霽到館十點三十分鐘往毅武女學校授甲乙二班國文宵往楊仁大書庄代諸生購來最新初等中史共五部

廿六日癸巳陰到館暮雨

廿七日甲午雨到館宵演算

廿八日乙未晴天氣溫暖穀雨節朝到館授課倉聖

誕日登峴山閣公祭字祖本年珂鳴社值祭李彬臣表兄與余也午刻疎雨旋止邀同人飲酒席散仍到館出文課題改甲班課余學禘至命分已三閱月其法深

奧變化無窮終未洞悉今夕姚子琪門人來舍指點一番
稍為覺悟校瀛寰全志中缺一頁心頗惜之

廿九日丙申雨來復不到館寫函寄汴省許州一與唐
叔王大令一與趙羽儀妹丈

與唐

前函諒已塵覽妾購茶葉已于穀雨前陸續買就

本年霪雨纏綿茶芽較去年為粗然中畧有佳者俟收
焙一齊再為評定分別寄奉茲先交郵送上四匣計十一斤
八兩乞答收至統買斤數若干價錢若干俟下躺遞齊開
單呈繳可也肅此手泐即候 公安不備

與趙

滄漢二函均捧讀矣稔知足下出行叶吉步履平

康無任忭慰茶葉已陸續照數採就屬三都嶺為多第
於商務一道實門外漢所購茶品未知有合亦公翁尊意
否茲先奉寄四函使唐君公餘之暇品味評嘗餘俟逐
躺寄出令姊舍妹均在家平安舍下大小亦托福斥逐
楊氏一案經官訊鞫獲全勝矣知念附聞本鄉多雨
鶯粟淹沒十之五六未知許邑陰晴如何念念餞春在
即化日舒長手此肅候並頌近佳百益

晦日丁酉朝雨檢點茶葉并函交郵寄與汴省許州
釐稅局唐大令又填免稅單四紙到館授課夕霽泛
舟往丁田探望長女弟為近日身患乳瘡奉母命一往也

日暮返舟

四月朔日戊戌晴到館率諸生謁聖得河南許州趙羽儀妹丈書謂前月初十日到汴自瑞至許計程四千餘里中間相隔祇十餘日何其速耶邇來鐵道大開征夫遠遊水路則駕輪舶陸行則乘火車一時稅駕飄忽而至古有縮地之方不圖於今日見之董田村人過訪為伊族人安啟因案被羈欲余設法以脫之也宵演算

二日己亥朝雨旋晴到館葉耕經送來新民叢報第四年三號一冊十句三十分鐘往毅武女校授甲班國文下午在館三日庚子晴到館宵雷雨

四日辛丑雨到館改乙班課

五日壬寅朝雨旋陰到館出文課改甲班課是夜社人送城隍神回宮出門遊散至夜半而返鳴鐘三下天雨六日癸卯雨旋陰來復不到館過岳母家一談訪孫經畬宵姚子琪黃慶潤來開夜課

七日甲辰雨節交首夏天氣沈寒衣猶裝棉天時不正莫甚于此到館授課宵演算

八日乙巳天早晴旋陰到館夕小雨作呈詞控陳慶瀛遣族人增楠投署宵演算

九日丙午陰旋雨到館

十日丁未朝晴到館夕雨為李松岑先生送葬至南門而返宵演算

十一日戊申天早大晴旋雨到館午後二句鐘往毅武女學校為甲班諸生拚文申刻還館宵演算

十二日己酉天早晴到館出文課改甲乙班課福潤局寄到日報季凡門人送來國粹學報第二年第 冊宵成錢

春詞八絕

錢春詞

春光去住最分明一曲驪歌怕倚聲珍重東風初告別
漫天飛絮觸離情綠葉成陰梅子肥園林何處覓芳

菲蝶心亦自憐春去爭逐殘花不住飛 羣鳥多情

倚樹啼長亭流水累橋西天涯芳草無窮碧夕照匆

匆促馬蹄 百結迴腸孰慰懷積成別恨計重重千金

一刻憐宵燭祇恐明晨報曉鐘 為招歌妓舞當筵似

我情長怨綠天九十韶光容易過曲江錢別記年年

醉倒江頭喚奈何衣襟孰浣酒痕多青山為主還相

送如許柔情托綠波 漫向風前惜別離文通我亦訂

心知送君南浦一揮手忍唱青青柳色詞 莫似浮

萍負夙因願償後約定來春瓊杯酌盡春江綠付與

同心結佩人

十三日庚戌天早雨旋晴立夏節來復不到館震軒妹
丈來葉耕經送來新民叢報第四年四號一冊過孫季茂
處一談其姪延曙暨葉艾汀接踵而至拍手坐論至暮宵
雷雨姚黃二生不至

十四日辛亥雨到館宵演算

十五日壬子雨到館授課宵霽見月成五言古風一首

積雨匝月春霽困人今夕茫然開霽銀蟾正圓清暉
入戶如對良朋喜成五言古風一章

久不見嫦娥苦遭雨師妬遙夜思美人雲泥隔不遇一旬
復一旬恒恐生逢暮天公反見憐為我撥雲霧宮闕聳

觚棱環珮鏘玉輅清韻傳鄰簫微風吹庭樹昂頭望九
霄咫尺天可步心事銀蟾知相見今如故真若耐久朋
握手通情素愛之不成眠坐對生幽趣一刻抵千金良
宵幸無誤僕本多情人愛月有深痼

十六日癸丑晴到館十句三十分鐘往毅武女學校授
甲班國文袖葉家所收會洋二十四圓交孫中愷公子宵
演算

十七日甲寅晴旋陰到館授課

十八日乙卯晴到館授課下午二句二十分鐘往毅武女
校督甲班拚文四句鐘仍回館宵與姚子琪論算法

十九日丙辰晴上午到館督諸生溫課下午出題作文
周田人蔡姓來訴三官堂住持妙安盜賣堂產眾為不
平且遇事生風狡險好訟村人半為魚肉眾憤殊甚欲
鳴官驅逐以靖地方近鄉紳士又欲收堂田充作學堂
常年經費矣聞此田係林姓所置故特貢一言余聞之
不悉其詳約以明日過庵查訪再為計較

二十日丁巳朝陰夕雨來復泛舟往丁田在舟中得七
絕八首過張震軒妹丈家留午餐飯後轉往周田過三
官庵訪住持不遇向其徒索筆手錄碑記遂過董田
周筱泉表弟酒肆中一談款以佳釀至暮阻雨不得歸

轉往汀川妹家過宿

泛舟至丁田書所見

為駕扁舟逐野鳧連朝雨足水平湖萬重山翠濃如
滴付與詩人補畫圖 村屋編茅近水斜炊烟午起
野人家千紅萬紫渾相間一路爭開鸚粟花 滿堤
芳草透生機綠長林陰護四圍掠水雙雙新燕子多
情傍槩不停飛 十里山光長短亭鳴蛙閣閣最堪
聽新秧刺水如針小繡出芳塍一段青 催到林間
布穀聲野田流水自盈盈農家東作功方始一雨扶
犁叱犢耕 石橋高跨曲如虹聚影遊魚唼落紅無

限輕舟來復去，權歌隱隱水雲中。浮波大小數青蘋，風景江村已暮春。隔水梨花開似雪，淡粧半面尚佳人。脫却羈塵寄畫橈，此生我願伴漁樵。未逢明月三分地，先度春風廿四橋。是日午後往周田，過三官堂訪佳持妙安，不遇散步堂。後墓壠依然地，廣二畝，規以短垣。上列石碑五方，中署友梅林真人墓，其左為樂閑方真人，其右為天泉徐真人，次于左者為虛白先生，次于右者為野鶴陳真人。墓前有碑碣，痕迹今竟無存。問諸村人曰：相傳為五進士坟，前豎石碑，聞係前明林姓刊置，上載田畝，茲為佳持妙安所碎，欲沒舊跡，以為

己物，且其人雖屬女流，而狡詐好訟，勝於男子。免頂田產五畝，有奇。一歸林培育，一歸蔡一聽。中獲贏餘英洋一百九十元，又向各佃增加耕本，極意羅掘，為數頗溢。佃戶租穀有尾欠者，不論多寡，即架詞捏控，胥差不時到門，屢遭騷擾。吾等鄉民深畏涉訟，祇得隱忍聽之。然合村之心，抱不平久矣。思驅逐而未發也。聞墓田二十餘畝，光緒初年歸上碼頭林家掌管。春秋設祭，頗盡心力。陳慶瀛繼之，經營二十餘年，祇供中飽。因犯盜案，重案被人告發，遂為武舉林星楠收管。迄今十餘載，彼此朋黨愈趨愈下，直不啻為妙安一家之私產也。言之如此，默記於心，即向妙安之徒索碑一觀，歎

側床下石已零落計大小六七枚取而聯合碑字尚不模糊
長六尺濶半之正面刊記田畝租額載在碑陰于是索筆
手錄記則一字無脫而畝數坐段則缺十之三四焉碑記云置
腴田二十餘畝以作歲時享祀之需祭之前一日必告於鍊師之
孫林氏者聞有改易林氏得以糾正之其為林家之物無疑未
又云鍊師為南社林氏舊家子字本然友梅其號也其為我
南門林氏無疑妙安為堂管理之人私賣墓產夤夜碎碑為
將來吞沒地步特意中事始信村人之說固不誣也中心憤
激不可言狀

附碑
集真林友梅墓祭田記

賜進士出身大中大夫雲南布政使司左叅政平陽陳宣授
賜進士出身承德郎北京工部都外清吏司主事

平陽
重器書

賜進士出身奉政大夫南京吏部驗封清吏司郎中

邑人
李敷篆

吾溫之瑞安集真道觀落魄真人鍊丹之地也落魄仙去
地因人勝往往居此者多超塵拔俗之士友梅林鍊師
其一也鍊師標高氣清夙悟玄旨為士夫所敬禮曩觀
宇久蔽不蔽旁風遂慨謀興作乃捐衣貲及募諸善信
若殿堂若門廡悉為維新如克家之令子極其力至於
就緒玄門遂為改觀嘗築墳構菴於邑華表村厝其
師方樂閑劒履而已之壽歲側焉茲置腴田貳拾畝以

備歲時享祀之需仍貯羨餘以為葺理計使嗣其後者
掌之祭之前一日必以告於鍊師之孫林氏者閒有移易林
氏得以糾正之其用心良篤作法良要也屬予為之記予謂
墓之設田所以廣恩愛而綿世澤吾儒之追養繼孝莫先
於此鍊師生儒家由儒入道見其制行皆率天性故所舉自
與吾儒合有孝敬仁愛之可傳况其所以為父子祖孫者非天
屬之懿苟不設羊以存禮緣石以舉實其不至忘其遠而
遺其久者幾希此其具田以供祀誠所思之匪夷也鍊師常
能導引六氣以回元陽故耆耄若少壯脩齡永年將必齊
廣成子儻丘木日拱忽三島十洲之興思而遊神於紫

府丹臺之上為之嗣者起春雨秋霜之感精神流通焄蒿悽
愴尚期披氅衣駕卿雲而或來香花鐘鼓黍稷惟馨馨稽
首望其靈光者恍若有見人和神悅福宗風而衍玄化永
有所賴也鍊師為邑南社林氏舊家子字本然友梅其號
也茲為記而書其事俾刻石以告來者若夫田畝之町段
與租之多寡則具載諸碑陰

銀壹百兩買田貳拾畝

作祭享修

理坎墻之需其田糧役出此租內今

於後

二畝

三畝

五畝

五角

二畝

四畝

一角

五角

一段十畝三丘坐蔡元

東蔡得阜高園 南

西本觀高園

早租八扛 晚租 扛

一段十畝半三丘坐殿 河

東本觀高園 南 田

西蔡元欽高園 北河

早租六扛 晚租三扛

一段五角坐淡尾

東官塘 南本觀高園田

一段一畝二分一丘坐陳 屋東

東蔡宅田 南河

一角 一畝 西蔡宅田 北蔡得阜田

早租五勾 晚租二勾四方

一段二分四厘坐殿後路東

東潘宅田 南馬迥田

一角 西蔡宅田 北鄭宅田

早租一勾 晚租二方

早租共十六扛晚租共八扛半

西河淡尾 北

早租一扛 晚

正德四年己巳正月

立

廿一日戊午朝晴張震軒妹丈囑余先將石碣載歸免遭推

沒生意外之虞頗信其言遂自丁田買舟往周田載之而返夕

陰不到館葉斐汀門人贈子師範講義共四冊宵演示

廿二日己未朝雨夕晴到館福潤局送到日報葉更令遞到

新民叢報本年第五冊得許州唐叔玉大令寄書寫覆函

寄唐并茶葉四匣又作書寄杭與宋子樞門人宵學祿

覆唐 今晨捧讀 尊札知首次寄呈茶葉四匣均已登

覽慰甚未稔此品有合尊意否辦事未諳恐負重托茲再
奉上四匣計六斤十兩內有一匣較為上品內已標明其一
匣為次餘二匣平平到時乞登收此外尚有二三匣及購買
若干銀之清單另容下牘奉寄舍下及諸親戚均平康毋
勞遠注刻因行輪期迫不遑細叙祈恕之羽儀妹丈不另
札乞代為致聲肅此奉覆謹頌公安

與宋

紫樞仁弟

如晤

前接手書已知賢弟得遇知心

獲插足之地僕不勝為之欣喜書問僕近日安硯何所如閱
子所謂仍舊貫者同學較去歲少三四人館課紛忙日不暇
給則又過之竊歎代人作嫁實無多意趣也黃啓元猶戀

戀不捨尚來就學姚子琪家蓉侄考入中學蔡作醴戴正
泮考入高等管家昆仲送入西南初等蒙學知念附聞鄙人
學祿漸有頭緒命分將近演畢未知賢弟邇來有工夫
習祿否念念努力春華希宜自愛并問近佳

廿三日庚申天早雨旋晴時氣較熱到館上午九句鐘往
毅武女學校授甲班國文夕仍在館宵演祿

廿四日辛酉朝晴到館近午偕同人管杏浦姜嶽仙潘志
篁吳伯屏薛玉坡朱玉如往彭耀卿家拜祭其護堂傳
孺人遂留飲時大雨傾盆平地水溢寸許席散始少止
宵學祿

廿五日壬戌朝雨旋晴到館張震軒妹丈來日夕返舟
宵演祿

廿六日癸亥晴到館改甲乙二班課卷郵局送到汴省
趙羽儀妹丈書宵習祿

廿七日甲子晴來復不到館周田人來說斥逐三官堂住
持因渠架詞誣控串差侵擾邀余急為舉行闔村誌德
辭以緩辦葉艾汀門人過訪

廿八日乙丑晴到館近日穀價騰貴民心悚惶張愚若
大令東請四隅紳士議開平糶公局賑濟貧民遂偕徐昭
甫管杏浦姜嶽仙潘子璜朱玉如往署謁見定期來月

十一日開糶宵雷電少雨

廿九日丙寅雨終日小滿到館作輓王孺人聯語孺人我
友周君曉秋之元配於本月中浣陡感痰疾而逝聞其持
家甚善賢而無子殊足惜也聯云繫彼婦德椎髻可風
相敬表齊眉不愧孟光羣羨梁鴻得嘉耦念我先人敵
廬不遠悼亡感良友為憐潘岳忍聞金鹿譜哀詞
閏四月朔日丁卯晴辰刻率諸生謁聖始授課九句
三十鐘往女學校授甲班國文夕仍到館宵習祿
二日戊辰晴到館午刻往珂鳴社收買字紙得殘本疑
雨集一冊名賦彙選二冊寄嶽雲古今體詩一冊聞係陳

竹生先生家藏本陳翁為邑茂才好詩善卜筮風雅自喜晚年蓄花嗜飲亦一老名士也歿後數載嗣子不肖積產蕩盡篇帙無存今見殘卷為之黯然

三日己巳雨到館申後周小泉表弟過訪為渠三房任訂姻於葉耕經之妹為人所聞邀余全往葉家說情宵學示

四日庚午雨到館改甲班課出文課福潤局送到日報宵學示

五日辛未朝雨夕霽來復不到館董田人過訪論救解食鴉片之毒法如下 嶗沙錢三分 漏蘆錢一分 膽礬十文 甘草五文

柿漆六文 用半錢水煎混涼些服下即解 申刻率諸生到明倫堂

聽演說姚子琪門人有遷喬之喜擬聯語以贈乞鄭一山書之其白云團體一家以和為貴高遷喬木依仁而居宵學示

六日壬申晴天氣頗寒到館宵姚子琪不來為是夜有鶯遷之喜

七日癸酉晴到館宵雨旋止演示

八日甲戌晴到館孫季芹門人送來國粹報第三冊是日邑民為米價騰貴鳴鑼罷市勢甚洶洶各處米店均遭倒毀沿街諸肆堅閉不啓莊捕主至暮出署彈壓

竟為衆人所辱夜半張邑令出示定價米一升制錢三十文准于十五日開局平糶而人心始靖吾觀今日民皆思亂富戶居奇彼此交爭積憤成仇一旦有土寇煽惑其間以之劫掠攻城奪邑其將何以處此由來者漸力為預防是在賢宰官操之先耳

九日乙亥晴往西北初等學堂作監督以周君曉秋辭退全人集議司事排日輪班暫膺其任余亦與焉本日係余輪值恐招芸人舍己之譏邀李穉菊代課宵演示十日丙子晴在館九句三十分鐘往毅武女學校課甲班國文下午仍到館李彬臣表兄為舅氏作七十冥壽

邀余作壽言成駢體叙文借胡蓉村大令名以重之宵學示

十一日丁丑晴到館課温熟出文題申刻西北學堂暨毅武女學校邀天然軒為諸同事及諸生攝影余亦與焉宵疎雨演示

十二日戊寅晴來復不到館宵學示

十三日己卯晴到館葉更令送到新民叢報本年第六號潤色昨作壽言日暮張震軒妹丈來喜極邀為改削三十餘字始定訪鄭君一山之代書之作寄汴趙羽儀妹丈書

寄趙

尊札二楮均捧讀矣第二次茶葉四篋于前月二十日交郵寄奉未翁想已登收餘俟下牘再繳我鄉邇來穀價騰貴計英洋乙圓糶穀四十八斤不等富家閉糶團積居奇實為可惡月之初九貧民乏食勢不安居滿城洶洶罷市二日張令不得已出示定價米一升三十文錢穀價未定四隅設平糶局以賑貧困自十五日為始至五月三十日止中間計有四十五日之久合城內外貧戶鱗齒獲穀濟急為數甚鉅執其事者不知若何挪措弟為西北本隅值辦所藏之穀祇有八萬餘石此重任竊恐公私不能兩全奈何奈何雲苓失聲宿恙至今未愈刻欲托

兄代購乾蛤蚧十對聞蚧蛤最為補陰之產其重在尾倘全身寄帶碍于包裹不妨摘取後尾以便郵達亦省此物其價尚廉大約壹角五分左右我瑞價培五倍芸弟屢托切切乞兄撥冗代為採購價值若干另行寄奉至囑至囑舍下自家慈以次大小均叨福庇舍妹暨令姊皆康強逢吉知念附聞專此奉達順問公安

壽李鶴坡先生暨管太孺人七十雙慶序代

皇上御極之三十二年丹宸祥凝彤廷詔下廣崇學校首重明倫西伯文王躬修儀於寢膳宣仁太后埒聖壽於乾坤興孝尊以一人推恩遠及四海矧在士庶同隸

幪援善則歸親之義有美必彰歌錫以純嘏之章隱德可
表此我姻兄彬臣昆玉所由為高堂稱觴而來乞序於元
也獨是元宦遊吳郡攝篆金沙案牘勞形筆硯久廢一
行作吏每執掌於簿書片紙傳書愧無辭以獻頌既承誣謗
敢謝不文謹就鶴坡先生之
行而揚權陳之
乎先生為
藍田望族隴右故家嗟失怙之童年領投機之母訓績懷
贈橘智解分甘容饌設雞禮能娛客自慚墨守以端木
為可師夙善經營學陶朱而追步苟完苟美衛荆遺風
買宅買鄰僧珍雅誼况乎得妣氏之內助為伯鸞之令妻
戒旦雞鳴靜好而瑟琴在御齊眉鴻按德而椎髻可風

易著家人詩稱偕老而我姻母管太孺人于歸韓氏善事龐
公鹿挽何勞桓少君拜姑當禮鳩毒誌警言齊姜氏相夫成名
計數十年來王孫善賈富焚僮笮馬之儲主饋有人安裙布
釵荆之樂固宜象賢繼起鳳雛蜚聲陳氏三君盡是璠璣
之器劉家七業各擅書數之長長君則貢選成均仲子亦
類水使非敬諧嘉耦義尚一門証陰德之耳鳴得上天
之孕育者其孰能如斯乎先是同居五世樂聚一堂吐藿
輝樓種荆分樹諸昆有秦鍼懼選之志乃公存姜肱共被
之心財產中分為薛包獨讓其美且其燃急鄙魏文忍棄
其親公之所為勝人一等有共昭也豈其得伯姬之助而讓

棗推梨抑其體虞舜之情而祇夔齊粟此公必得其壽
坐享大名良有由已今者棟風告至化日舒長屈攬揆之
長衍古稀之算並頭花放百子草薰孺人以十四日設悅
而紀庚而公以十七日懸弧而登壽椿豈競茂杯泛雙螺橋
梓相承名齊三鳳香生燕寢佳兒均萊綵承歡陰展龍門
文孫與芝蘭並秀元葭葦泰附蔭暘久叨仰齒德之俱尊
瞻桑梓而彌敬所憾板輿缺奉花誥貤封留春暉寸草之
心動白雲思親之慕撫躬自問抱愧滋多羨君絳樹徵歌
已雅譜雙聲之曲惜予吳江隔水願遙飛三侑之觴
十四日庚辰晴到館

十五日辛巳晴芒種是日西北開糶倉米到館率諸生謁
聖始授課近午往女校授甲班國文夕仍在館宵演示
十六日壬午晴是日往西北蒙學堂權任監督之事邀李
穉菊伏課宵雷雨旋霽學示

十七日癸未晴申刻雨旋霽是日李舅氏生長諸中表
為作七十冥壽特放假一天卓午往拜遂留飲宵演算
十八日甲申朝晴夕雷雨到館改甲乙二班課出文課宵
演示

十九日乙酉朝乍晴乍雨夕雷雨來復不到館宵霽見
月演算

二十日丙戌晴到館宵數學子命分演畢計命分共四百
問自客歲十月十日起至本日止共演二百一十餘日甚矣其難也
廿一日丁亥晴到館

廿二日戊子晴到館近午往女學校授甲班國文夕仍在
館聞孫德鴻門人感暑庸醫誤藥閱數日而亡中心傷悼
廿三日己丑雨邀李禪菊表弟代課往西北學堂權膺
監督之任

廿四日庚寅晴在館夕往毅武女學校命甲班拈文

廿五日辛卯晴在館課諸生溫積熟出文課題得宋生書
廿六日壬辰晴來復不到館得汴省唐永玉大令書

廿七日癸巳晴夕空雷不雨到館福潤局送到日報

廿八日甲午晴在館孫經畬銑公子代購明儒學案一冊

此書係黃梨洲先生原本梁任公節定之原書計六十二
卷頗嫌繁衍經飲冰子節畧為二十卷使閱者較為便焉
價英銀一圓五角作九折算宵學示始演小數

廿九日乙未晴在館近午往毅武女學校授甲班國文
夕仍到館宵演示

三十日丙申晴邀李禪菊表弟代課往西北初等學堂
權充監督之任宵雷勢甚銳心為之顛雨又極大

五月朔日丁酉晴立夏節天氣炎熱到館率諸生謁聖

始授課卓午初聞蟬聲下午三句鐘往毅武女學校課甲班拚文仍在館宵疎雨演算

二日戊戌晴到館卓午往珂鳴社收買字紙得扁鵲心書殘本一冊缺下卷夕雷雨虹見出文課題日暮命諸生放節假以初四日為始定一禮拜先後也

三日己亥晴來復在家閱日報夕大雷甚雨平地水溢二寸

四日庚子晴在家解拆賬務夕雷大雨傾盆平地水溢四寸

端陽日辛丑晴朝書雄黃字糊貼門楣循俗例也擬一聯云

三年艾蒿為醫國九節蒲應拜此君福潤句送到日報

六日壬寅晴朝泛櫂往丁田在舟中倚枕看環游月球近午

抵震軒妹丈家日暮返舟葉耕經送到新民叢報本年第七

八兩冊

七日癸卯晴往西北學堂作監督夕全沈教習眉川遊觀各

處學校西南東北為上東南翼聖次之高等中學不在列

惟競智最劣宵空雷不雨

八日甲辰晴閱日報是夕夏家鼎家萬昆仲來舍夜讀

九日乙巳晴在家閱日報

十日丙午晴來復

十一日丁未晴假滿到館

十二日戊申晴天氣炎熱如火之蒸到館

十三日己酉晴氣熱如火到館九勺鐘往毅武女學校授甲班國文夕仍在館宵過薛王坡處一談

十四日庚戌晴在西北初等學堂權司監督之事邀李祥菊表弟代課宵雷少雨

十五日辛亥晴夕空雷無雨到館

十六日壬子晴到館得汴省趙羽儀妹文書

十七日癸丑晴小暑來復不到館福潤勺送到日報夕率諸生赴明倫堂聽演說

十八日甲寅晴到館大考期近朝課諸生溫倫理夕攷問得宋子樞書宵周眉仙來談

十九日乙卯晴天氣極熱到館課諸生溫經學并攷問改甲課宵周眉仙來譚

二十日丙辰晴熱到館朝溫經學夕攷問改甲課往毅武女學校課甲班作日記孫季芄處送來本年國粹學報第四冊

廿一日丁巳晴熱到館朝課諸生溫經學夕攷問宵雷雨炎威頓退演祿

廿二日戊午晴天早雨到館課諸生溫經學并攷問

廿三日己未晴天早率西北初等諸生往東較場與高等中學暨各隅合操張邑尊往閱孫中容項申甫二主政偕馬諸君演操陣式整肅以之相較惟西北最上張令贊賞不置每人

獎給紋銀服章一具已正散隊仍到館溫經學并攷問夕率西北蒙養諸童往高等學堂應試桐兒亦在其列頗中規矩宵演祿

廿四日庚申初伏朝晴夕陰來復不到館演算得四式夜雨廿五日辛酉朝陰夕雨到館課諸生溫經學并攷問往東北學堂集議同人署名稟公拆毀贊幽廟以儆惡俗也

廿六日壬戌天早雨旋陰夕晴到館課諸生溫中史并攷問
是日吳君伯屏為義渡改辦尚未就緒特借羅木寺開設義
渡改良雄辨會同人到會集議頗多彼此交爭言少中肯詩
云謀夫孔多是用不集發言盈庭誰敢執其咎古人之言洵
不誣也

廿七日癸亥晴往丁田張震軒妹文家探問寓甥嗽恙尚
未愈也暮歸福潤局送到日報

廿八日甲子天早雨陰晴不定微有風意到館課諸生溫中
史并攷問張縣尊押折贊幽廟購備女學獎賞

廿九日乙丑陰雨不定到館下午往顯祐廟會議為本年義
倉暨廟衆輪交瓜期已及同人公舉擇交倉董則管杏浦
徐昭甫王廟事則歸周曉秋姜文初張也

六月朔日丙寅陰雨不定到館率諸生謁聖溫西史并攷
問卓午往陶尖廟飲交衆酒席散仍在館作書與趙羽儀
妹丈交郵寄汴不及

二日丁卯東北風未定時雨時晴來復不到館朝患腹瀉
午刻在李麗生家試新余家亦嘗新宵邀親友就飲惟

陳丹卿不至

三日戊辰東北風未靜到館朝課諸生溫輿地夕攷問宵演祿

四日己巳晴風定大暑節到館朝課諸生溫輿地夕攷問宵演祿

五日庚午晴連旬酷熱溽暑逼人刻因各學校暑假爰向吳伯屏假女校以避暑遂遷往焉是日溫課不攷問周田人蔡正海過談

六日辛未晴乘舟往周田飭保丁世榮封各佃戶早租不許被妙安私取順途過丁田乞震軒妹丈代構控妙安呈詞

允之日暮始返

七日壬申晴到館課諸生溫輿地夕攷問申刻震軒妹丈遣人送呈詞來

八日癸酉晴不到館朝搨墓田碑記夕令族人遞呈控道姑妙安盜賣墓產暮雷無雨宵演祿

九日甲戌晴到館招諸生考祿學夕雷疎雨宵往孫中愷公子家飲人情酒為詰嗣延曙締姻娶項申甫崧進士之女公子也夜半曾廷溥黃韻初來訪

十日乙亥晴熱甚不到館午刻在曾君廷溥家試新申刻空雷無雨偕盧光榮老人步往丁田為妹家嘗新踐約赴

席故也

十一日丙子晴夕雷無雨暮自丁田歸福潤句送到日報
接汴省唐處寄來蛤蚧二具并宋子樞門人函宵演算
十二日丁丑晴夕雷無雨到館為諸生補溫地理并攷問周
田人來訴被妙安誣控為差駭擾余聞之中心大為不平葉
更今送到新民叢報本年第九號宵演算

十三日戊寅晴到館為諸生補溫國文并攷問作覆趙羽儀
妹丈書交郵寄汴成控盜葬呈詞并抄倩人投署宵演算
覆趙羽儀妹丈足下 時光迅速溽暑初交竹徑納涼瓜棚
消熱兩心印可諒同情也接讀十二日覆札一切領悉足下

禔躬叶吉旅社日增早符忭祝但近閱中外日報中載五月
初旬許州大水老少被水淹沒計二千餘口憶自汴梁一省
四月亢旱土麥歉收五月大雨沙水漲溢民沒為魚水旱不
時一歲兩見上天降災何酷乃爾未知此信果確否念念切
切惠我好音以紓遠慮土稅近日加重許地亦一例否如實
行其事本年公項較去年大覺為難使司權者無所措手
耳蛤蚧二具已收到價錢若干乞為開明以便交繳舍妹囑
購淺色絲綢多少尺數憑兄酌裁又麗生托購土絲綢以
應酒肆中之用粗亦無妨切乞一併代剪舍下自護堂以次均
平康令姊舍妹亦逢吉示翁處不另札乞代為致聲專

此手覆順頌近祺百益

十四日己卯晴到館得縣署批謂妙安管理該堂歷有年所如果出自畜緣借名納污該族長等何以均置不問直至今日始行呈控其間顯有插幫情弊所請碍難照准等語余覽此批不勝大憤氣不平者竟日

十五日庚辰晴到館率諸生謁聖始授課戌刻月食

十六日辛巳晴來復不到館下午四句鐘葉芟汀門人折柬邀余往飛雲閣飲會酒在席者孫忱叔公子項幼彝洪授齡德齋昆仲張衡甫家漱泉及余也日暮始散宵在李禪菊

表弟家嘗新

十七日壬午晴李麗生妹丈因連日酷熱諸生徒朝來夕返恐中暑氣囑余暫放半月暑假故不到館在家閱日報十八日癸未朝晴再作呈詞控妙安因前日訪曾叙卿先生得其盜賣田產實據中間鋪叙眉目最清未知一投得中否申後聞雷大風少雨往署親遞張邑尊有要公不遑坐收酌以來朝至暮而返宵雨極大演祿

十九日甲申立秋節朝晴袖昨日呈詞往署投遞夕雷雨虹見閱日報宵張君肖維過訪談至夜半

二十日乙酉晴朝遣盧光榮老人袖昨所構呈詞乞張震軒

妹丈一評夕訪孫經畬公子購來西史綱目二函計八冊價英銀二圓孫季苾送到國粹學報第五冊

附函 震軒妹丈大人 左右

前日呈詞不及寄削已投署矣未

知得勝否中間盜賣田號昨向曾處取來至魚鱗田段亦盡詳悉刻存敝架指實之處皆本於此昨地保來云沈子瑤代妙安周旋囑其代放田租渠以林姓來村親封護之予無大力不能擔認此任云云本日妙安又向族長處欲自討情族長亦置之不理弟以為租穀存在各佃處不稱等語餽羊不若憑衆稱歸以作官司之費且林姓之田稱歸林姓必非格外吾兄以為何如專此手肅頓請近佳

廿一日丙戌晴盧光榮老人自丁田返袖還昨呈并軒兄所擬之詞來函云此係再呈與初呈不同務須將批詞一一解剖方能案無遁飾尊詞複行前呈是文不對題故易之此詞頗具匠心勿草草閱過為盼云云閱其來信所言頗當刻已投署悔不及追大為誌恨深感良朋忠告不我棄也宵演示

附軒擬呈

為踞久弊生串刁克賣再祈恩准吊核究逐以便更

正完管事竊生等前控道姑陳吳氏盤踞周田三官堂盜賣族祖林友梅墓田并推碎墓碑一案沐批該道姑居住多年如果盜賣納污該族長何以不早呈控保無插捏情弊碍難照准云云生等思該道姑若非佔住多年焉敢魚緣串賣是

盜賣正由住久而來^生等現已查得確實證據再為 憲天一
一陳之攷從前三官堂住持均係道人與集真觀聲氣聯絡
寬緣光緒二十八年間^生家集雲山祖墓被訟棍陳慶瀛盜掘
^生族祖生員林冠南風聞周田林友梅祖墓祀田亦遭慶瀛盜
管因轉託族紳丁田武舉林星楠就近招人住持此道姑陳吳
氏黃緣入住之因由也該道姑初住之年尚假託清修不露劣
迹^生等亦得過且過無事苟未不料盜掘之案疊控多年巨款
依然漏網^生等方椎心泣血之不遑更何暇再問周田墓產此道
姑陳吳氏佔居多年盜賣納污^生等不早發覺之實在情形也
該道姑自恃住久遂上結刁紳下串地痞胆於光緒廿八年間朦

聳林前憲將墓田集真觀觀歲修兩戶改充入八都三官堂戶
又藉端修葺轉札加耕田戶盡怨聲載道該道姑知無人阻
撓舊冬遂將結字號田一畝五分契賣與林培育家又二畝四
分契賣與蔡一聰蔡一柳家均由三官堂戶除入三十五都林
友增戶八都蔡瑞發戶完粮粮額扣除架册鉄炳又復包藏
禍心冀泯痕跡胆將四百餘年註明祀田之墓碑黃夜雇人
椎碎若非田戶等知情預先通風更閱數年則族祖墓難保
不餒痛苦教此^生等所以再祈恩准弔核究逐之實在情形也
總之祖為林祖田為林田林氏子孫私賣^生族且當鳴究何況賣
自道姑祖業被侵子孫理應追復何所用其插捏不已粘電

田單迫詞再叩伏乞 老公祖恩准電核嚴提陳吳氏究賣懲串弔架更正庶祀產得以完管大德上呈

廿二日丁亥晴在家閱日報董田陳竹堧來邀余構禁賭呈詞允之

廿三日戊子晴盧光榮老往丁田寫函覆張震軒妹丈代作禁賭呈詞交陳竹堧投遞訪王玉卿宵演祿至小數除法

覆軒兄

軒兄足下接讀尊詞所叙情節照批翻駁直如對症發藥無可移易但憾鄙詞于十八日冒昧投署鋪叙之事終覺顛預必遭批駁悔何可追本日擬欲不待縣主批語再將尊詞投入據房友云進之大驟於理未合姑俟明日批示何

如再于廿八投入矣亦未甚遲 兄見高明代為一決稱租一節本欲速行奈族人增楠在銅乾收租此人能幹一勝千百且俟一二日後舉行可也窩甥嗽恙及熱癩平復否南河甥女身子舒暢否窳甥身上癩蟲已退否念念肅此手奉順請暑安

附呈

陳成銀陳春水等為賭風日盛先事預防僉請准予飭保一面出示嚴禁事竊 等居邑八九兩都董田東垵地方安分務農各尚儉樸自昔至今恪守鄉約凡有違禁之事杜之益力所以靖里閭敦鄉俗也近來賭風甚盛逐逐者多聞有不法之徒每借鄉村會市之名逞聚賭開場之志

暗中摸索以為利藪少年為其引誘害莫甚焉本村游閒
之輩亦欲尤而效之者此風斷不可長身等平素守己擇
仁而居誠恐惡少見利生心犯例開賭一則破壞風俗一則憤
擊尋仇苟不自預防任其聚賭將意外生虞奚堪拖累請
示懲禁以杜惡萌固分內事也再烟館為藏盜之所三十年來
本村從無開賣近亦有人議股合開而躍躍欲試者倘一聽
開放必滋多事 仁憲夙以鋤奸除暴為心厚視子民必不
容惡莠以擾鄉里烟賭二項如蒙飭保隨時查禁一面出示
禁止則闔村安靖而匪類不生矣為此不已僉叩伏乞 大
老爺恩賜准予分別飭保示禁以弭惡俗以安閭里身等不

勝啣感之至大德上呈

廿四日己丑晴偕族人增楠往周田各田戶處收早租均說暫
為告緩俟晚禾清交總以認付林姓為主合村老少聞余至皆
樂迎見并邀余驅逐妙安為地除害銘佩無忘也過蔡君錫教
家一譚至暮而返房友送來呈批仍有不准之語中心憤激自不可過
廿五日庚寅晴福潤局送到日報得宋生子樞書知自隨營
考入弁目學堂中心為之欣喜代族弟增楠寫函寄與童西
園為旌亦壽乾東裝赴蘇附入武備學堂童君係楠妻兄
在蘇某營掌辦文案欲渠代為周旋免致棘手也宵演祈
是日未伏

附童函

西園內兄足下許久不晤渴想彌殷足下駐轡勾
吳名譽學業日益加進較之弟僕僕市廛刺漆弱線者相
去奚啻分毫啓者今日停罷科舉學堂林立各直省大相合
符有志向學者不憚千里均趨之若鶩為功名計為自立
計無怪其然敵族叔壽乾為菊樵先生之五子近日束裝往
蘇省武備學堂肄業奈年尚少乏人作存稔知足下駐足
吳中必多知己又令姪為武備教習以同鄉之故定不見棄
伊到之日已駕代為周旋附名應考以慰來學者之心想
近水樓臺必先得月叨在至戚諒不我拒至懇至懇舍
下大小均托庇毋勞遠注專此奉候順請公安

廿六日辛卯晴在家閱日報黃慶潤門人擬入滬上理化速
成科肄業本晚束裝晉郡余贈贐儀英銀一圓
廿七日壬辰晴在家閱日報作書覆宋子樞門人訪家庭
蘭欲托伊往銅乾收早租約以今宵訂定宵深竟不負約
來訂明日啓行談至夜半

與宋

紫樞仁弟足下

昨接手榷知足下于是月二

十日由小隊選入弁目學堂出谷遷喬高明之見從此得
機得勢風順鴻毛幸甚慰甚聞足下前時滯迹小隊營
身受奇虐營官之刻峻軍法之森嚴飲食之菲薄備嘗
艱苦此中景况固不堪言至于稍蹈微愆動輒得咎非加

以詬詈即箠杖交下甚至羈束其嚴一犯其規閉之暗室我輩為柔弱書生為進身計棄文習武屬之不得已身未加進反遭辱身古人云士可殺不可辱足下殆未之思耶邇來土匪充斥奔命不時武備成軍必以兵生為先導如來書云出師剿匪晝夜奔走無論草木叢雜之處嶺徑逼仄之區槍駕於肩彈束於腰從事戎行不勝其苦而况殺賊如鋤惡草壯者猶能舉槍發彈怯者不免破膽驚心足下所言實乃身親其境而畢肖其形雖諸君屈意從軍冀得微勞以收後效自鄙見揣之如此世界滿目荆棘且蔑視士類衣冠掃地誠有所不忍言者矣宣聖云成事不說既往不咎亞聖云仕非

為貧也而有時乎為貧抱關擊柝為家貧親老計各行其是要不容相強耳足下善自為謀已超苦海願此後詳加審慎擇木而棲當知命而樂天勿徵幸以行險白圭三復師事南宮今日為孝子他時必為忠臣使堂上心安無虧子職斯為得也鄙人株守蓬門井蛙見小年逾不惑功名念灰所言每與世忤難免為高人所譏然直言不諱特為知己勉耳月前書來辱問家中瑣務此節尚屬子虛聞令弟居家屢拂親意令尊中年失偶內助無人撫此琴絃彌增悵觸足下千里遠遊久踈定省望月思鄉能無滋感惟期努力自愛稍獲寸進即以報親家督之分不可干也啓

元同學本晚束裝乘輪赴滬擬入理化速成科肄業以求
他日成立地步同學相從皆不及門頗動離索之感足下
其諒予心否試論暫存俟暇改削歸趙酷暑未退汗雨如
珠手此布覆順問近佳

廿八日癸巳晴曝書下午家庭蘭兄偕盧光榮老人往銅乾
收租暮雷少雨宵演祿

廿九日甲午晴曝書申刻雷驟雨即止

三十日乙未晴曝書申刻聞雷疎雨

七月朔日丙申曝書家庭蘭兄自銅乾收租返獲穀計
八百餘斤申刻空雷無雨

二日丁酉晴曝書柳老仁送來舊本施注蘇詩計十冊陶
集二冊邊予購之聞係周煥文荳家物

三日戊戌晴曝書宵演祿

四日己亥晴

顏宜煥室日記 丁未

元日癸巳雨早起盥手焚香拜祖先謁萱堂讀王蘭泉先生集經義制事異同論試筆鄭一山明經來賀年坐頃邀余往陶尖殿觀劇宵閱著作林

二日甲午雨朝趙羽儀妹丈李彬臣表兄鏐琳表弟乃文鴻文泮文渙文洪文諸表侄均來賀年夕李穉菊陳丹卿二中表造門來賀偶成五言一律課諸兒諸書宵閱著作林

新正二日偶成

三日乙未雨朝起校東嘉文徵此書共六十卷均故鄉先哲遺文前明周天錫參政所輯係藏鈔本客歲假諸孫季茂門人而鈔之未歲李友樵內弟蔚文表侄來夕往仲季二妹家暨諸舅氏處賀年宵閱著作林

四日丙申雨內子生日適當不惑之年朝校慎江文徵夕往岳家暨洪授齡表兄劉祝堯表亦陳丹卿伍寶滋二中表處賀年申後雨止微有晴意黃慶潤門人來謁宵霽見星閱著作林

五日丁酉晴旭射窓煖氣滿室頗悅人意朝洪德卿伍寶滋二表弟王浦東義兒蔡麴夫門人均來賀年午刻在李

麗生表弟處飲圓真酒夕過裕牲魚行與友樵內弟坐話宵初李穉菊家圓真來招余飲

六日戊戌天早晴旋陰校東嘉文徵近午張震軒妹丈來賀年李玉君表弟留飲余亦與焉夕寒氣凝重雪珠散下軒兄返權歸宵閱著作林

七日己亥雨近午鄭一山兄攜其子閱梅來拜年坐談頗久夕雨止全趙羽儀妹丈過衛房宮遇伍襄羣轉往悟真寺遊玩時有匠人以泥塑送子觀音像廬山面目宛然如生誰謂工匠中無善技乎宵閱著作林

八日庚子雨水節朝雨閱曾文正公批牘夕西北風驟起

陰雲四散天宇開朗諺云穀日晴主年豐未知有驗否薄暮
家家燃火盆余家未能免俗諸兒在庭前戲放花篝火燄成
花足以寓目宵閱太平廣記情感類

九日辛丑晴終日演祿姚子琪門人過訪宵閱著作林

十日壬寅晴朝攜柶榭桐三兒登九坦山謁二世祖暨曾王父
大父及先君子墓維時天氣初晴鳥聲清脆陌上油花遍開
盛盡黃如金散尤增清趣得五言二律七言二律近午始歸卓
午李友樵內弟來邀飲蓋令晨胡邦楨袂凡夫婦有反馬之
喜特設筵以相叙也家梅仙葉雲村亦在座宵復留飲至夜
半踏月而歸

附錄 郊行

十一日癸卯晴終日演祿宵校東嘉文徵

十二日甲辰晴朝過李彬臣表兄家一談午刻趙羽儀妹丈設席款唐赤玉大令招余陪飲李蔚文表侄與馬劇談至莫宵深天氣增寒米雪隨雨而下挑燈校東嘉文徵

十三日乙巳雨天色昏暝閱人心緒演祿得比例法近午李麗生表弟來留飲趙羽儀妹丈亦至姚子琪門人來旋去夕周眉仙過訪坐談頗久宵校東嘉文徵至先宮詹公所著叔孫得臣敗狄于鹹解言頗激烈蓋借古人之經傳作近世之諷辭中間引

晁錯諫伐匈奴一段言匈奴隱指蒙古也其時先公當明之季內政外交均壞于樞臣之手以致思陵身殉社稷九鼎遷移易海變桑黍離故國先公所言誠見之先也嗚呼樞臣誤國何代蔑有以前證今如同一轍彼任國家之責而身居權要者其亦有鑒于此歟是夜挑燈校閱至四鼓

十四日丙午巳刻陰雲稍開畧有晴意旋東北風驟起復雨代鄭一山擬節孝亭聯語地展半弓留母蔭流長十里衍東湖演祿福潤局送到日報一束申刻家毓卿過訪姚生子錕接踵而來余欲詢以比例中率外率之理又被客阻不能暢論洵乎求學之難也明晨官僚祭周湖葉公寫祝章宵閱

著作林

十五日丁未雨終日演祿薄暮趙羽儀妹丈招飲宵深往陶尖殿觀劇

十六日戊申雨朝演祿近午往珂鳴社收買字紙得殘本五經類編七冊文選集評四冊檢閱題簽係宋象臣王賓先生家物也先生少時家貧好學旋游庠以上舍生即貢成均古耕自贍儉師晏子至中年頗有蓄積產有四子心好遊蕩均不成名先生捐館後諸子浪遊田園盡廢劉夢得詩云生兒不象賢斯言固不誣也對此殘編令人興覆車之感薄暮姚子琪來閱余所演祿式頗有進步且指點公同比例之理宵往陶

尖殿觀劇

十七日己酉雨朝習祿孫桐軒主政折東來訂明晨開館夕煥卿族兄為桐昌侵吞南祀眾產邀全毓卿伯輿暨南門房子侄輩來舍乞余核對譜系排定各房輪值先後次序免致爭越談至日暮始去宵往陶尖殿觀劇夜深雨止

十八日庚戌晴早晨瓦霜鋪厚其白如銀己刻館主人孫桐軒主政遣使邀請開館從遊者孫延錦韻茶二兄妹李慶瀏內弟附學午刻設席款留在坐者項蓮溪先生暨其侄幼煥葉聲石陳雲生也暮自館歸聞孫季凡門人來訪不值而去留下改良德象女校廣告而德象同人亦有知單余一時見

疑即訪季芃詢其改良原由蓋為蕭君亦陶腐敗之故也德象
之發起人項志貞旭仙薛仲渠張毅夫諸君蕭侃為監督蕭仁果
許 二女士為教習初時僑寓滙頭劉氏宅為校舍生徒計
十餘人不計少長均許入校凡來觀學者蕭君謂女校非他校
者比皆拒之不納以故內容外表深淺莫明一如夫子之宮牆而美
富無從窺也暑假之後因劉宅湫隘改僦玉尺書院為講學之地蕭
君恃其女為教習己為監督遂挈家移居校舍若將終焉閱二月
季芃之妹及侄女與其侄媳因鄰近始入校受課所授之課字
皆傳誤烏焉倒置伏獵不分於是教員之空疏教科之腐敗
一時發現欲掩彌彰此季芃改良之說所自起而任德象之義務

教習所由兆也且蕭項諸人有可疑者本邑有担班分子軍六
民四積年以來具有章程項志貞先受民班賄囑復欲軍班每
歲報効女校經費遂具稟溫處勸學公所遞下照會改為軍二
民八繼見軍民兩班交關不已恐生他變復備稟溫之勸學所滕
聳孫總理私發照會於瑞邑陳令轉定為軍三民七此事舞弊
實項君主使之也季芃獲此消息暗地上郡搜出私稿向其兄
仲容先生表明蕭項之鬼蜮舞弊徇私實難曲恕此季芃第三
次軍六民四之照會所由復出也自有第三次之照會倡辦德象
之諸君大興矛戟自有第一改良之廣告而前之教督蕭君愈起
衝突彼則攻其奪主權此則責其強盤踞遂有翌日明倫堂公議

之訂刻聞蕭項私黨甚多團結堅固季芃則同志寥寥寡不敵衆正不知勝敗誰屬也嗚呼合羣公理誰不云然學界同人各難副實欲求進步洵乎非易若季芃雖近冒昧而熱心勃發勢不可遏猶足取也坐談久之即袖國粹學報第二年十二三兩號而歸宵往陶尖殿觀劇

十九日辛亥朝晴旋陰天氣極寒霰下如豆到館夕同人為德象女校交爭接辦集議於明倫堂余為館事所羈不得去宵雨閱報二十日壬子晴日融和微風駘蕩各處學堂開課送桐兒進堂讀書已刻李淑芳內弟邀余為其子玉炯暨其侄玉鈿發蒙夕訪孫季芃茶話之間始知昨夕會議彼此交爭勢不兩立幾至用武所賴

項申甫太守在會力為排解乃散然芃之情激心不能平亦勢所必然也轉過仲愷公子家遇項申甫暢談德象今日爭訟之原因芃弟以監督自居固大唐突而蕭之腐敗甘為盤踞其迹亦不可掩此事係於地方名譽必當衷諸一是以斂其鋒頊君直任調停之舉謂士林中人自相魚肉大不祥也余默然而出項君亦去日已薄暮宵在岳家飲酒計設二席余居首座

廿一日癸丑晴到館暫定課程改星期為丁期以為休沐之日傍晚自館中歸見縣署磚牆貼有孫季芃改良德象并指蕭侃盤踞公地第二次廣告大小計一千五百餘字言頗激烈想挾私者對之應惶然而汗下矣宵閱日報

廿二日甲寅晴到館閱著作林曾永均徐永綠二人進塾讀書宵演祚姚子琪來

廿三日乙卯晴驚蟄節毅武女校開學余居同事之列往為襄贊計學生四十餘人已刻到館功課餘暇習演祚數勇氏忌日卓午李麗生表弟邀余往拜遂留飲夕仍在館宵閱日報

廿四日丙辰晴朝到館課諸生溫積熟夕出文課題三句鐘後項調甫楊小村洪小遯胡友松諸君設會于中學堂此會為蕭孫交責德象腐敗出而為之調停邀集同人酌議余亦與焉調停之法德象女校仍歸發起人接辦其居玉尺之蕭君須擇地移居以免貽人口實擔班分子裁定軍五民五彼此相當不滋蠻觸報効學費

軍民均以乙百五十數為限當此之時項申甫主政邀在會諸人議定是非辨明可否當憑面一決不袒蕭亦不徇孫照單簽字以承認多數者為之酌列會諸人皆謂軍民均平最為公允認可者十之七八惟何萊齋張毅夫項任礎薛玉坡諸君則謂民班人數甚夥須照三七定章為妥否則爭鬪恐未已也王衍秋言近中立於是座上諸君心知有偏于蕭皆不之許又以認可居多數須訂今日之議備稟垂為定案可也不然則以四六舊制為率即謂偏袒於孫亦勢所必然也又議季芄須另辦一校不可干預德象至經費定以成立一年者始許提去其班分報効之費酌以十股德象及季芄另設之校須以七成勻派其三成則已成之毅武長春二女校勻攤因兩校係初等開用尚

未鉅也所議如此至日暮始散宵習算

廿五日丁巳晴休沐不到館朝往毅武女校贈教丙班夕演習算數
福潤局送到日報薄暮李彬臣表兄過訪囑作祭周幼仙明經文幼仙
為彬臣之妻弟談頃而去宵初過周眉仙家與姜文初夏家鼎坐談至
夜半

廿六日戊午先君忌日早起霧氣濛濛庭階潮濕近午始散見日終日在
館演祿葉更今送到新民叢報第四年第十四號薄暮過楊仁大書
莊代曾昭仁門人購來通商書札一部余亦購取謝皋羽集四冊嚶
求集二冊傍晚母氏往季妹家宵至麗生處與羽儀妹丈坐話頗久
廿七日己未天早霧幔重重四山不見近午放晴到館周鹿峯表兄來

拜真夕代作祭周幼仙文宵訪李彬臣表兄袖所作祭章草本囑蔚文表
侄騰真

嗚呼人誰不死生宇宙間沒沒無名腐同草木死而成名猶生之年是
知人之身死無論夭壽而所重均在名也君少而聰穎好學擅其名
矣長應童試冠軍博其名矣旋登上舍即貢成均而士林又震其名
此外如書法之肖於鍾王授徒之埒於馬鄭名譽日以富君之生平
躬修實踐文行兼優以因證果已決其身後有餘榮矣去歲君就
青田講席之聘適際朝廷舉行立憲新政發達之初年當強仕躬任
先知組織文明誘掖後進非君其誰任之乃有志未逮年假旋里閱十

數日而疾作疾數日增劇而遽逝病之所因其熱心勃發而至此耶其積瘁勞神而至此耶抑多才而招造物之忌耶否則其死也亂投藥石而誤於庸醫耶以君之孝友人無間言以君之廉直人所共信似宜永其天年以收後效况席先德之餘蔭有以報後人宋大孺人君之生母而邦之外姑也孺人不以適室自嫌歸我外舅苓仙先生產君兄弟姊妹三人年未三十而外舅捐館舍家無儋石撫子成立男女婚嫁恒藉針黹之資以供復不以邦之不才慨然以君之姊來歸君伯兄小苓外姑之從子也少失怙恃外姑愛憐備至一如己出延師課讀長而成名皆君之母之力賢哉母也有賢母必有賢子一門聚順歡樂無極固其所已無如月不常圓春難長駐升沈靡定聚

散無常丙戌五月外姑辭世享年四十有九癸卯二月君姊云亡得年四十有六去冬君又櫻疾而終年僅四十有四母姊及弟均遭厄於中年何其不幸也君之去矣妻孥子幼謀生無從靈具有知不勝悽楚嗚呼昊天不弔哲人云逝良材秀挺遭隨折頽天耶命耶復何言耶邦自君之姊亡後內助無人年近知命躬櫻家累斷絃抱戚又觸山陽人非木石孰能無情昔江文通云送君南浦傷如之何君家濱東湖流水湯湯伊人不
在碧草猶春為之招魂湖上豈不倍增惆悵耶雖然邦之哭君弔君猶不離兒女之態生來死往君心早自分明立德立功死且不朽君念及此不禁翩然而含笑矣臨風灑筆用敢摠情君靈在天尚其鑒諸

廿八日庚申晨有霧巳刻放晴出東門弔周幼仙明經循途到館夕習演祿數宵校東嘉文徵

廿九日辛酉寒氣逼人朝陰到館近午雨霰夕訪孫季凡門人袖校過文徵三冊還之復假來五冊談頃仍往館習祿宵閱日報

二月朔日壬戌陰到館寫祭文昌致齋三日榜薄暮往裕昌魚行與李友樵漱芳內弟坐談劇久宵初母氏自季妹家歸

二日癸亥辰陰巳刻雨到館長妹自丁田來歸宵閱日報是夜備辦祭品遣柁柁兩兒上西峴山伺候官僚謁祭余家舊有禮書房缺故任辦祭之責

三日甲子晴旋陰到館錄近作詩文習祿是日諸生或感風寒或絆

家事均不在塾惟女學生韻茶一人周曉秋遣伴來邀備述吳君之屏請洪為毅武女校教習後因年齡太少恐滋物議以西北初等戊班程度太雜議延洪君為幫教同人集議均不認可且鐘點無多而脯金頗厚恐對各教習有所齟齬也此事原因係之屏與洪德齋直接特邀同人至德齋家辭之宵初之屏聞之大不為然且怪同人未識其心邀眾再議舉為校中庶務員始可兩全其美吳君始允四日乙丑朝陰李乃文表侄到館讀書夕晴長妹返權歸丁田命柁兒隨行送之申後王玉卿遣其徒來館邀余往署與同事酌議蓋內署刻開条子速繳各壇廟祭祀分肉印簿并歷年辦祭豆品開消錢數也館課未竟訂以晚間宵往縣庫全議

邵仲溥向內署周旋其事始無蔓語

五日丙寅陰到館朝課諸生溫積熟夕出文課題榘兒自丁田返宵習祿

六日丁卯朝陰往毅武女校授課甲乙兩班命榘兒隨林德星司務學習裁縫邀李禕菊表弟送之此子性質魯鈍恐學書不成故令棄儒習藝建一事業為將來地也夕雨習祿至二鼓七日戊辰雨到館午刻全李乃文曾昭仁往孫經畬公子處購來文明改良書札教科書一函余亦購得鄭所南文集鄭菊山詩甲申傳信錄金陵癸甲雜識黃梨洲行朝錄共書六種計六冊宵演習祿數

八日己巳晴到館宵張震軒妹夫來邀余參考王景治河根原惟顧氏日知錄載之甚詳趙羽儀李麗生後至談久軒兄冒雨而去而趙李則坐談至二鼓

九日庚午大雨竟日春分節朝聞雷到館孫延錦前數日感風告假不至今愈始來受課宵在李麗生妹夫家與蔣中笙先生坐談至夜半

十日辛未陰榘兒初入商界邀李麗生妹夫送往裕泉魚行拜李漱芳內弟為師棄儒學賈特欲補余之缺亦效西人重商之一法也到館授課宵微雨閱報

十一日壬申陰雨到館授課福潤旬送到日報代李麗生妹夫作書

寄與其侄公任時公任表侄在北京東安門譯學館中肄業也宵課梅桐二兒讀書并寫春祭武帝分胙票

與公任侄書

寄京師東安門譯學館

申後書

晨接來函近况備悉想譯學開館課程嚴密逐日無餘閒矣本年學費定已繳齊衣食諸件未知可設用否舊冬支用介師印結之費正月已付還其家英洋二百元今歲各項細用理應自備逐稿寄出近與陳宅訂過京中俸銀許侄支取償還陳欸無庸轉寄京津陸續直交陳介師處家用刻已立下手摺逐次滙付矣此節甚便一則省却滙票二則先後付還均係小數不似多數猝無以應介師之惠不可忘也

徐老伯處已修函通知未得侄之回鴻念念

但願賢侄用度節制不以此欸順便有所藉手

當用則用不可則止勿豐勿儉獨運輓轡斯為慰耳至諸項一歲中定額開用計數若干下稿切切開單寄知以便預算應付其譯學之章程與夫上下兩學期之學費膳費定數如何或增或減一併寄

覽來札論及學費膳費有所增減計一年中開消尚未明白

楊志齋先生五十之欸元正自鄂備函來

討賢侄當辨明來歷或湊足歸趙或修函回覆是否急為酌定作答以踐前言本店支用頗鉅實難措拄三家鼎峙都仰給于此中加以食指日繁費用甚廣且婚嫁喜事接踵而至倘一竭泉源枯難分潤其奈之何今春欲與汝伯商酌店務另立章程籌善後之策免致掣肘賢侄以為何如汝兄蔚文思往杭省投考警察本月初十晚已動身矣同仁醫學會已停辦彼雖有志向上猶

恐不免浪遊也泮文洪文鴻文珪文龍文均選入西北初等小學肄業乃文則從小竹表伯讀書表伯本年設館于孫主政桐軒家館金頗豐從者較少且安硯之所大覺清幽諒受學者得力必多也近聞賢侄與姜牽不睦大相齟齬此節斷不可也客冬牽雖鹵莽修書催侄就館為未得真消息之故熱心所發恐意外生虞未雨綢繆情猶可諒假令急需其人定期受課牽居日下不致一辭侄亦見怪凡事須作退一步想則芥蒂自消且誼關中表彼此參商有所不便願自三思以釋前嫌可也京中風氣多尚奔競花天酒地借此應酬賢侄置身其間切宜自伸主權勿效隨波逐流墮斯氣節古人云與善人居如入芝蘭之室久而不聞其香又云居是邦也事

其大夫之賢者友其士之仁者要在守厥名言無負此躬已耳姪之親事定于邱家介師之甥女也已于二月初十納采侄為陳家甥婿想介師當必格外相親將來學問進步財力贊助胥于此日基之再三思維具此美舉其有裨於姪也多矣項君弟初曾于初十日束裝赴津托帶酒汗一瓶衣包一具至時管收侄家瑣事余當力為調排不必遠注以疲精神以妨功課至囑至囑家中大小及諸親戚處皆康強逢吉知念附聞春寒逼人宜自珍重專此手泐順問近佳十二日癸酉陰雲不散細雨如絲到館是夜雨止仲春例祭關帝使柁樽兩兒伺候官僚謁祭

十三日甲戌陰到館授課暇時習祿薄暮往中學堂訪張震軒妹

丈坐談至宵深而返

十四日乙亥陰微雨到館授課暇時習祿宵雨止寫仲春祭文昌分
昨票閱中外日報

十五日丙子朝晴夕雨到館孫延錦李乃文往潘埭謁墓不至課諸
生溫積熟并文課題餘暇演祿宵閱日報是夜文帝春祭遣柵梅
兩兒上西峴山閣伺候官僚余因雨勢滂沱山徑偏仄積多泥瀟恐
兒失慎中心徬徨遂冒雨登山相與檢點遇鄭一山管仲凌李幼梅
諸君蓋任贊襄之事也天曙始歸

十六日丁丑雨不到館朝往毅武女校贈教甲乙兩班夕倦眠宵雨
止在李麗生妹大家飲節酒曹定甫先生趙羽儀妹丈均作不速
之客而至席散坐話頗久

十七日戊寅朝陰旋雨到館授課暇時習祿薄暮過裕泉魚行
與漱芳內弟坐談頗久宵初往姚子琪門人家研究祿學駁論比
例之理鈞衡度尺輕重短長比較相等頗于數理得其涯涘者
十八日己卯和風吹暖大放晴光頗暢人意朝到館成七言二律
午後天氣清朗乍動遊興全趙羽儀妹丈李乃文表侄登城散
步過飛雲閣倚欄縱目春景生新徧陌菜花黃如金布湖雲嶺
樹罨畫初晴此景此樓比之蓬萊仙閣不多讓也日過晡始由大
較場而西過裕姓魚行小憩與司帳董美叙話及歸已薄暮矣
李彬臣表兄過訪宵深全至其家一談是夜天宇無塵月光如

水

十九日庚辰晴在館

二十日辛巳晴寒氣未消在館宵李麗生妹丈設席款留孫子珍

先生邀余陪飲震軒妹丈亦在座

廿一日壬午晴在館福潤旬送到日報一束宵閱日報

廿二日癸未雨在館授課夕李慶瀏曾昭仁徐益芬不至作大宗清明掃墓規書序并祭墓文薄暮過岳母家與李淑芳內弟坐談頗久至宵深始歸

大宗寒食掃墓規書序

今夫木以本榮無本則不植水以源遠無源則易枯吾人之生原出乎祖一如木之有本水之有源也苟拔本而塞源欲其枝昌葉茂澤遠流長抑亦難矣吾濟南氏族由閩遷瑞始于文質公再世正仲懿仲二公先後登魏科理學傳家芳承雙桂

本乎此也溯自文質公選卜瑞邑家稱素封既營第宅于望
江復築吉壙於集雲今藏字三百一十五號之山名為炮塗坦者
即昔日我祖宅卜佳城之處也岡陵廣敞周圍五六里環山附葬
遺塚纍纍不下百餘數墓誌碑碣歸然具存由宋而元而明以
至聖清中間賢六七作文修行植或以忠介著或以隱遯傳非皆
祖宗之遺德有以蔭之乎然而有可慮者族大支繁遷徙靡定年
湮代遠展謁不時倘使無人過問塚埋青草轉滋他族之實偏
處此者故夫壬辰冬杪為邑之巨猾陳慶瀛盜掘先塋舉族惶
惶鳴官究詰歷十寒暑始復舊觀瀛亦被錮而死雖先人靈爽
有所式憑而祭典久虛致啓覬覦實為子孫之咎夫一誤豈容

再誤鑿厥前車欲缺憾之能彌必慎修而思永時竹崖公派下
之十世孫立貴家有薄積年老鰥居以客歲歿故無嗣爭
繼而染指者多此外惟泉田二畝六分係貴手贖回不敢分毫
懸而未定余乍聞之深喜謀置墓田之有基礎因是商諸族長
成良公暨毓卿增楠鳳奴煥鎬桐昌五人議拔此田作為大宗
清明祭掃之用先一日致祭不得違期間一歲南祀房長靜山
謂貴屬南岳公支派此產應歸本支私自捏飾強分八分充己
戶而二畝有奇之田遂三分而去一矣余援大義責之唇焦舌敝
靜山強項終不之屈然為祖宗而啟爭端大為不祥乾餼失德
朋友垂戒况同姓之骨肉乎彼甘背本姑隱忍聽之而已所憾置

產無多蹄泠易竭恐此後不繼等諸餽羊反負謀始者之苦心甚願二三同志嚴守規約力補前愆毋以世遠而見歧毋以物微而見弛秋霜春露永厥孝思斯為孫子者其職稍盡若夫廣置祀田規模閎遠用揚前烈勿替馨香則俟諸異日尤為余所樂成之也是為序

寒食祭祖墓文

懿歟我祖兆此佳城繼世二仲巍巍科名儒林循吏志乘光榮宋元以降而明而清賢六七作勿替簪纓濟南望族赫奕有聲載祀六百綿衍雲初羣叨祖蔭壽石永貞枝昌葉茂莫之與京惟山之陽集雲峯撐風承雙桂宅我先塋挹河之秀鍾嶽之英祥靈

東聚爽氣西迎馨香明德永保生生秋霜春露報答宗祊年年寒食祀事孔明羞薦蘋綠杯酌泉清神其來格鑒此虔誠尚饗廿三日甲申晴旋陰寒食節假不到館仝族人增楠孺奴桐昌上九壇山掃墓山人謝學銀款留午餐山肴野蔌頗覺適口至日晡始下山宵在桐昌家飲上攻酒是年碎昌值祭因其家居南岸往返維勞桐昌蓋為之代庖也席散族人邀余暨毓卿增楠訪池雲珊志澄先生面說酌祖樹滋堂房舍近因李淑梅孝廉洪萊仙王小博管仲凌李仲毅四明經鄭子籌典籍暨池君創辦公育初等學堂暫租南門堂為講習之所此堂檀樾歸我族姓且有額數戶名非泛為公地者比堂旁數楹復有桐昌僦之王氏婦者特恐族

中之蠹暗地分肥故集同人向司董公認而訂租也談久之而返
廿四日乙酉晴朗風和清明節客冬震軒羽儀麗生三妹丈購送
壽屏六幅預為家慈七日祝壽軒兄撰文新春囑鄭一山明經書
之今日良辰山兄代予懸之屏右抄祭大宗始祖祝文午刻往宗祠
拜謁值祭為族長成良公余居襄贊之列申後席散張震軒妹丈
偕窩窰兩甥自丁田至宵在李穉菊表弟家飲節酒席散後全
窩甥桐兒在燈幔下散步過中學堂與軒兄坐談甚久

廿五日丙戌陰旋晴朝補釘明刻鹽鐵論殘本夕閱日報宵初
震軒妹丈全窩甥窰窰兒泛舟歸丁田

廿六日丁亥陰旋雨朝習祚卓午設饌祭祖先留趙羽儀妹丈
小飲夕池雲珊先生遣地保曹玉鏘送來頂首英洋十五元并囑
賃居之婁王氏即日他徙以便安排講舍也隨喚王氏之戚面交前
存頂首款項又囑桐昌湊付五元合成二十之數以還之始了其事
毓卿全來面付宵閱日報

廿七日戊子晴朝孫桐軒君遣人邀余上館余以有事辭之遂攜
柁檣桐樅諸兒上集雲萬松二山祭掃祖墓宵全毓卿族弟訪
管君仲凌以公育祖札之事相托坐談頗久

廿八日己丑朝陰薄霧迷漫鄭君一山過訪遂相約出遊午後周
眉仙來代夏家鼎闕說改課之事允之全往小沙堤城隍行宮觀
劇徐昭甫懋森君為其尊甫祝嘏折柬索詩宵閱日報

廿九日庚寅晴城隍神清迎孫季茂門人遣伴送到丁未國粹學報第一冊往裕泉魚行小坐包小亭姜文初亦至宵習祿

三十日辛卯晴早晨家毓卿來邀余今訪池雲珊先生遇之謂立札一節俟之明日開堂時與眾酌定談頃而歸校中學堂地理課本係軒兄編輯所課也夕為夏家鼎議歷史數題與之震軒妹丈偕寓甥自丁田復至宵今柁桐兩兒暨寓甥在燈幔下遊玩復至羽儀家一坐時唐赤玉之夫人黃氏在其家囑兒輩謁叩

附歷史題 漢文帝好賢不能竟賈生之用論 韓侂胄孟珙皆主重伐金以雪前恥乃韓敗而孟竟成其故安在 中國仿行立憲以圖自強可能暢行無阻而比美于泰西否試暢論之 中國刑律改重為輕取法泰西能決其後日之無流弊否試抒己見而論定之

三月朔日壬辰朝陰微雨閱日報夕晴全趙羽儀妹丈寓甥柁兒

往后洋觀劇遇鄭君一山是日里人奉輔正王像出巡駐轡后洋且赴周襄展墓每歲此日樂為迎神演劇實定例也考邑志輔正王即蔡公敬則為漢安鄉侯曾為南陽宰有循吏風遺愛在民里社感之而崇奉靡已或謂公漢建安時人建安為獻帝年號漢書循吏不為公立傳亦一疑也宵閱日報

二日癸巳晴朝在家閱日報夕聞李漱芳內弟與順記老三爭執遂往詢之賴蔣中笙君從中調停其事始寢便過陳府廟觀劇遇家雨臣胡邦楨葉雲村諸君福潤局送到日報一束葉更令送來新民叢報第四年十五十六兩冊宵閱報三日甲午祖母生辰天早晴代李麗生表弟作書寄其侄

公任始到館潘震炯門人過訪代改輓岳丈堂聯李慶瀏傷風告假而歸夕令張震軒妹丈過孫經畬公子家採購國粹新出諸書均未寄到遂別軒兄冒雨到館宵往裕泉魚行小飲係順記息事和酒在座者沈藝軒家梅仙雨臣葉雲村胡邦植邵老錢及李友樵淑芳兩內弟也

附書

前月二十日之函已接閱矣得稔賢侄康強逢吉欣慰欣慰印結之費未知介師修書通知徐老伯否近日陳太夫子備函寄廣東定為此事囑託介師且本店付款已立手摺想陳家決然無疑况侄係伊家甥婿更為親近倘或徐老伯處未接此信侄當寄函廣東與介師直接可也近來市面較為清靜不比上年輝

煌米價騰貴人心惶惶本店生意亦覺岑寂財力之艱甚可歎也項弟秋定已到京所帶酒汗及衣包等物想交到矣念念草此佈達順問近好

四日乙未雨到館授課餘暇習祿午刻便過縣東庫司帳

出新編尺牘課本邀余解說指示頗久宵閱日報

五日丙申雨到館課諸生溫積熟并授干支月令諸名義夕出文課題宵往姚子琪門人家研究同理繁比例之理

六日丁酉雨不到館朝往毅武女校授甲班國文并出文課題

智愚說夕閱日報宵習祿

七日戊戌朝雨夕晴到館改女校甲班文課宵習祿

八日己亥朝陰旋晴到館改課宵閱日報

九日庚子雨穀雨周老浦送到惜抱軒全集計二十冊歸震川集計十六冊係其叔小苓先生家藏本也余憶去年小苓曾與余談及此二集欲以求售余嫌囊澀不能傾以相易而心未之忘今春偶與老浦言及之故轉致其叔而搜篋送來也計來價英銀四元作九折算須三元六角約以四日後繳楚到館申後曾定甫先生有溫溪掃墓之行邀余同往遊眺辭之不赴坐談至暮宵習演祕數

十日辛丑晴到館曾昭仁徐益芬往郡掃墓不至宵習祕十一日壬寅晴到館福潤局送到日報午刻往九如錢庄假來英洋二元小洋二十二角以備小苓償書之價宵社人奉城隍神夜巡攜諸兒窩甥出南門往裕牲魚行看燈

十二日癸卯晴朝到館授課夕在家閱日報宵社中人奉城隍神回宮攜樽兒窩甥出門在神前隨眾裝扮罪人此鄉俗也過金文興帽庄遇洪棟園師遊玩至三鼓

十三日甲辰晴朝袖香燭代窩甥往城隍殿叩謁過周小苓先生家繳交書價坐談半日夕到館孫經畬公子送到血史一冊此書原名暗殺案所載皆秦西烈俠之士閱之諸傳令人動天外昂頭之舉宵倦眠甚早

十四日乙巳晴到館暇時演祕洪棟園夫子送到著作林第

十號

十五日丙午晴朝到館授課孫延錦韻茶二門人隨其母往頭陀寺拜佛夕不赴館閱日報宵初同人為舊冬集股開張裕姓魚行未獲面訂規約特設席邀諸君少叙以成其事

十七日丁未不到館天色晴朗借李乃文表侄舊館為安硯之所欲為避器計耳成雜感七律八首宵訪姚子琪門人不值

雜感

制勝端由運智圓羨魚無網笑臨淵平生志不求溫飽王道情非近黨偏豈有山林開捷徑恒多仕官藉彘緣夏蟲未許談冰雪逐熱因人蠅與蟬
羣如傀儡戲登場我本書

癡別有腸世路險巖多棘刺人情翻覆最炎涼敢言天命非

歸漢近留學東國者頗有革命思想疇恤民艱為發棠淮湘大水民遭臨溺朝廷屢詔

振恤而官吏徒事虛文惠不下逮以致輾轉溝壑者不下數十萬慘矣讀史翻滋興替感年來國事等

蜩蟬 江河日下不堪論哀哀諸公負聖恩未鑒秦亡終

覆轍竟成晉政列多門億千民孰驚獅夢三百人皆寄鶴軒

近今仕途太雜或報効而得卿銜或納賂而膺上選至其家世如何才識如何不問也空做歐西求進化夕陽雖好近

黃昏 城社憑依徧鼠狐書生無力絕根株英雄事業成

窮狗憔悴年華過隙駒聖學昌明傳孔孟孔子為中國大教育家客歲季冬有

宣聖升入大祀之詔并飭學部編孔子世家為教科書以崇聖教邪言橫恣甚楊朱近日私家著述層見叠出皆非正論

少年子弟半為所惑甚可懼也六經未火斯文在好古任人笑我迂 愛

國無人起熱心誰歌板蕩進詩箴波蘭夷滅為殷鑒曲午
衰微感陸沈九鼎真安猶是昔六州鑄錯始于今

各省鐵路縱橫萬里
漸次告成或借洋款籌辦或招西商
集股利權旁落不能獨攬致多交涉

狂瀾欲挽嗟何及徒效賈生泪

滿襟 日彩飛揚耀國旂維新枉法昔周姬儒生畢竟

無奇策時局真如不定棋鳳豈隨羣棲擇木雞猶斷尾

憚為犧葭蒼露白情洄溯願伴伊人在水湄 我家故

物祇青氈坐困春秋年復年末路誰還知己顧丈夫絕不

受人憐九州疆域多沿革萬古滄桑幾變遷每恐危言

招黨禍載歌抑戒與賓筵 俗眼從來祇相皮千金駿

骨幾人知讀書豈為求名計退食常深補過思自信安貧

能安道漫言履險視如夷權衡獨握端趨向免致亡羊辨路

歧 十七日戊申雨天早鄭一山君過訪囑予代其侄作輓祖母聯

語 家學淵源溯通德苦節早勵冰霜方期棹楔邀榮揚彤管之輝啓我後

人行祖清芬常領訓 府君棄養無多年抱憾未乾血泪今復重慈下世讀

陳精一表閔予小子餘生孤露更吞聲 欲買舟往丁田舟子張媿夙

有烟癖恨其趨趨不前叱之使去遂不果行到館授課餘暇

習祚孫季芃門人遣伴來討舊年代塾報費并道其侄公權

刻已東旋宵過姚子琪家研究祚理至三鼓

十八日己酉晴到館午後訪孫季芃門人袖小銀圓十元送之遇

公權芝汀二門人坐談頗久仍赴館宵習祿

十九日庚戌晴到館孫延錦感風不上課餘暇演習祿數宵姚子琪門人來謂將有武林之行應試高等恐其尊人不允邀余往為關說遂至其家談論屈更深而返

二十日辛亥晴天早全毓卿訪池雲珊先生乞寫公育學堂祖札每年交祖銀英洋七元到館孫延錦李慶瀏二生不上課補作雜感二首申刻過中學堂與震軒妹丈坐話薄暮過姚子琪門人家一談宵刪改近作詩是夜五鼓有雨

人生離合與悲歡情緒紛紛變萬端聞道南風歌不競空嗟東晉失偏安中原久被羣胡擾

英擾西藏法窺雲南德佔膠州俄豔伊犁日駐遼東強鄰擾擾國勢日蹙桑榆

晚景其何以堪

廣廈能支一木難坐對河山增舊感惟留明月照闌干

名利胥忘歎寡傳詎隨流俗共沈浮儲書還望佳兒守數典毋忘乃祖修鳥倦還巢甘息影蟲能應候慣吟秋自憐自愛行吾素笑彼崇朝抱杞憂

廿一日壬子陰到館暇時演祿夏家鼎自平邑順溪寄到課文

二篇

廿二日癸丑晴天氣驟熱近早夏矣到館孫韻茶往親戚家飲酒不至習祿比例祿式已畢課季妹來歸甯薄暮聞雷少雨送妹歸過姚子琪家研究祿理為詳允濬蔡作醴乍至遂敗興而返

廿三日甲寅晴在館朝陳丹卿表弟過訪宵代唐亦玉大令成壽
張子蕃先生六十七言二律

壽張子蕃演先生六十大

清河耆舊著名門花甲初週晉酒樽曲水精廬甘隱逸曾
小園倚臨曲水以佐盤桓橫渠家學有淵源松喬鍊骨徵多壽桐竹添枝慶

抱孫君今夏喜抱孫矣遊宦汴梁天萬里飛觴何日賦高軒庭

護瞬屈古稀年家慈來歲壽躋七秩羣議觴祝介祝為君紀壽先百忍堂銘

添菊頌三春花事話桃筵齊眉相敬傳鴻婦弱歲蜚聲得

象賢令即醒同弱冠游庠名噪一時媿我有才輸子畏聊吟蕪句寄汀川

廿四日乙卯雨朝到館午刻請唐叔玉大令小酌設席于飛雲

閣邀張震軒趙羽儀李麗生三妹丈鄭君一山全飲惟葉雲村
不至薄暮始散歸成七言二律宵閱日報

春暮即事

風光回首是耶非單袷新裁換舊衣
踈地落花當晝晝水漫天舞絮悵春歸
細評經史常排榻每避賓朋為掩扉
芳草階前隨意綠一般活潑透生機

東郊晚步

健步何須借杖藜徑茅闢盡自成蹊
夕陽點點翻鴉背芳草青青戀馬蹄
一帶村容留畫補無邊山色與天齊
農家檢點春耕事叱犢田間綠上犁

廿五日丙辰晴立夏節到館課諸生溫積熟出文課題宵往姚子琪門人家研究祕數

廿六日丁巳晴雨不定朝往毅武女校授甲乙兩班國文夕演習祕數薄暮訪薛君玉坡遇蕭亦陶侃項志貞廷珍周曉秋之

楨吳伯屏之翰家樹齋敏諸君余之此行蓋為張林氏控王炳

雨賴婚呈詞係坡老主筆炳雨與趙羽儀妹丈稍有瓜葛余受其托而邀薛君調處以息事也宵在姚子琪門人家習祕研究九減之法至三鼓而返

廿七日戊午晴到館授課送姚子琪門人往武林成七言六絕宵初袖詩并贖儀往其家贈之坐談至二鼓

送姚生子琪瑾往武林時將應試杭省高等學堂也

一載從遊契若斯不才如我擁皋比談經促坐眠同榻莫問更闌雞唱時君于乙巳從余學計一載矣批燈坐對結契獨深誰

知青色勝于藍數理精微許共譚余素不解周髀之學君勸余習之兩相研究今始稍識門徑矣自悔從前工末技桑榆雖補抱多慙

少年志氣盡豪橫破浪乘風壯此行轉瞬飛騰張翮健鵬天萬里展雲程前途事業莫從容江浙潮聲壯

拓胸借力扶搖伸獨步快登千仞最高峯我也離羣又索居及門聚散悵何如人言教學原相長猶望卜商一起

予今朝婪尾報開花判袂河梁日已斜到此臨歧無

別贈願君努力愛春華

廿八日己未晴晨往姚子琪家送行不及近午登西峴山閣
謁拜倉聖是年值祭者余味蘭邱叔祥也夕到館宵在叔
祥家飲酒席散漏已三下

廿九日庚申晴到館福潤局送到日報一束代周君仲明熙海成
詠商務公所花木七言一律蓋受張震軒妹丈之囑也

商務公所新植花木當春繁盛喜而有作步胡鶴汀先生韻
新政當陽日正中承天佳蔭發蔥龍十年樹木從今始一洗
塵心萬古空非種必鋤圖蔓草揚仁共許納和風家園合
願春長駐駐春余家園名莫負前人培植功

四月朔日辛酉晴到館葉耕經送來新民叢報第四年十七十八

兩冊暇時習祿宵閱日報

二日壬戌晴到館夕出信札課宵閱日報夜雨

三日癸亥雨到館改課午刻過中學堂與震軒妹丈坐談池君
仲麟出俞曲園先生賀孫止庵學士重宴鹿鳴詩相示并獲見
孫仲容刑部輓俞蔭甫太史聯

孫蕞田前輩重赴 恩榮之宴賦詩寄賀即呈 雅正

疊頌 恩命下彤墀盛事流傳到浙西昔歲鹿鳴曾再賦此

時雁塔又重題青雲千輩皆居後近科翰林認殿單共一千餘人而公為之冠黃閣三

公孰與齊朝中大學士皆公後輩矣更有臨淮元老在同將山斗拜昌黎

孝少奎傳相為公會試分校所得士

頭銜一世似水清今日欣遷異數榮二品官

階新拜 命四朝聲望舊登瀛却符故事黃崑圃本朝重宴

隆辛未黃叔琳始為湖遺聞張景卿宋張昇字景卿大中祥符八思榮自乾

以詹事加侍郎銜年乙卯歷六十年龐元英文昌祥錄載只惜未留莘老在宋史孫覺孫

之以為佳話按此乃重宴恩榮之權輿令兄琴西大僕同年令人回首不勝情

莘老乃覺字也今借謂孫中容先生輓俞太史聯

一代碩師在嘉定高郵而上方冀老期集慶齊算喬松

何圖夢兆嗟蛇讀兩平議遺書樸學銷沈同墜淚

年私淑媿未列趙商張逸之班况復父執彫零半悲宿草今

又神傷化鶴檢三大憂手墨餘生孤露更吞聲

四日甲子雨到館作壽徐小雲先生七十眉壽七古一章宵閱

日報

壽徐小雲先生七秩雙慶兼祝昭甫姻兄五十

桃花紅綻春醅綠絳樹交奏雙聲曲堂開畫錦敞瓊筵當

庭萊舞皆蘭玉我翁門第非寒微翁之尊人徐熙遺派知者

希不求導引身強健鶴髮童顏臻古稀平生愛花花作主

栽菊種蕉慣聽雨評花之外工丹青筆底烟蘿俱入古圍棋

賭墅仰高風撫琴目每送飛鴻昔人奇才擅三絕翁抱清才

許共同梁桮齊眉成白首天之所賦洵獨厚龐公偕隱棲鹿

門神仙眷屬今徐叟雛鳳聲勝老鳳清文壇鏖戰早馳名

昭甫姻兄少負一門具慶家之瑞堂構相承橋梓榮翁與金太孺人年偕七秩而昭甫復與項孺人適當知命之年父子具慶洵盛事也

之後有達人九如晉頌詩天保寸心留草答護帷轉瞬黃花進

菊危家慈壽臻七秩今歲九月擬舉觴祝為公先譜南飛曲慚我未超梅鶴姿

五日乙丑雨到館終日代鄭一山吳伯屏周曉秋作壽徐小雲先生

七律三首薄暮過中學堂訪震軒妹丈出所作邀為改易謂此詩

格律警嚴無懈可擊也宵閱日報

代鄭古稀初度兆遐齡桃杏筵前拜壽星石奮名門徵具慶公

金太孺人年均七秩昭甫姻丈與項孺人又逢五旬一門重慶並祝齊眉龐公偕隱仰前型清才自昔推三絕

公善琴棋詩學於今踵四靈徐照字靈暉徐璣字靈淵為永嘉四靈之二通德里居承祖蔭

願將帶草附松苓代吳吾翁門第占清華喬梓重榮慶疊加

公與金太孺人年均七秩而昭甫仁兄與項孺人又均五十

梁氏齊眉臻白首新豐一集為傳家宋徐九成崇安

人惟耽琴畫閒尋趣不讓仙人好種花公善琴棋又善丹青分得德仁佳釀在

登堂介祝泛杯霞吳瑛字德仁宋時人臨溪築屋釀酒種花以鳴高蹈代周瓊筵夕敬奏笙

簞眉壽公今過杖鄉身比喬松能鍊骨手栽桃杏久成行公好種花

木三山日月春常駐萬石門庭慶有光公與金太孺人年均七秩昭甫仁兄偕項孺人年亦五旬

我本濂溪老居士並頭蓮放侑霞觴

六月丙寅晴晨訪鄭一山君囑書壽詩并以代作律體贈之到

館課諸生溫積熟出文課題宵初月色清澈全李乃文表侄往

三港殿觀劇遇孫子珍先生李麗生妹丈轉過豐潤莊與曾定

甫先生坐談至三鼓

七日丁卯晴朝往毅武女學校授甲乙二班國文夕倦眠半日宵閱日報

八日戊辰晴到館趙羽儀妹丈邀余代擬呈詞二件一為王炳雨投訊一為族里公剖頗得頭緒午刻過其家乞為潤色留午餐囑葉味蘭抄就候其來城投遞仍往館宵閱日報

九日己巳晴在館宵全鄭一山兄往三港殿觀劇遇曾定甫先生孫君子珍邀余過豐潤錢庄一坐山兄先歸茶話至夜半郭門已閉啓鑰而入

十日庚午晴旋陰到館福潤局送到日報一束下午代李麗生

妹丈寄與其侄公任家書片刻成之薄暮大雨聞雷徹夜閱日報

附札

與公任侄 三月初旬續札諒早入覽姪所寄安函叙及近

况均已閱悉聞譯學又于前月續行招考班次當有更動新入選者定復不少近未知揭曉否姪居何班學習何國文字并所課何書係何善本望下躺便鴻細叙以慰遠懷所作文課切為寄閱一二為好前言店中之事一節用款太繁須另立章程三家協力為善後計近日主義與前說大相反也汝伯願提款退出自立門戶店業均歸三四兩房管理諸多曲折深賴孫子珍蔣仲笙兩先生暨管仲凌表叔鼎力周旋漸有定局想事之成與否即在目前矣賢侄以為何如汝兄辭文羈跡杭城未獲插足之處刻

聞警察續次招考是否應招尚無消息糟魚近已製就俟便郵寄
仲凌表叔托購京式金頂及烟袋帶二件切代採買幸勿遺忘心
汝妹四月十三日出閣婚期在即知念附聞餘事續達便詢近好
十一日辛未陰小滿節朝到館改課夕偕周曉秋眉僊吳伯屏朱
玉如往徐昭甫君家飲酒蓋渠為尊人設壽筵招同人宴會也
席散冒雨而歸時已薄暮宵在同豐南貨店與張震軒妹丈管
君仲凌蔣君中笙坐談為受麗生之托代為彬臣表兄訂立合
股約也

十二日壬申晴旋陰夏家鼎自平邑北港順溪寄來課卷二篇
即為改前寄二藝托周眉仙代寄申後往李友樵內弟家蓋玉

鏘內侄明晨婚娶今晚備牲牢祭天邀余作襄贊也宵初大雨焚
香謝天余司祝同列執事者家梅仙雨臣李友蘭葉雲村方礪石
十三日癸酉晴終日在李友樵內弟家偕李友蘭同司禮物出入
薄暮玉鏘內侄接娶劉氏女行親迎禮偕家梅仙乘轎隨之以
為後殿名曰壓轎亦鄉俗使然也劉家之接客者方紱夫章子
貞也迨新人迎門時已更許合卺成禮筵設佳期席散而歸漏
三下矣

十四日甲戌晴終日在李友樵內弟處午刻飲鬧房酒申後族
姪乃緯來白其父本日在四賢祠中聚賭為警察所窺送縣羈
押邀余設法救挽以無力辭然為同族故中心猶耿耿也薄暮歸

倦眠至二鼓起視披衣滿庭朗月遂出門往岳家聽曲四鼓始返十五日乙亥晴午刻往孫中愷公子家飲人情酒為延春門人有燕喜之詠全席者項小石渭漁家友槎李幼梅公權門人掌壺筵散時已申後宵在友樵內弟家聽曲更深踏月而回

十六日丙子晴到館改課出文題聞桐兒患肝熱而便溺失常者已七八日刻苦頭眩即命其僮僕謁家梅僊一診投以解熱之劑薄暮仲妹歸甯宵初桐兒小腹作痛適李麗生妹丈來見此情況邀其弟稚菊來診投一劑越片時許溺稍下余心始定十七日丁丑晴休息不到館晨起聞桐兒小便稍適心為之安往訪李稚菊邀酌清涼數味藥投之以杜病根轉過毅武女校授

乙班國文夕閱日報聞南門外仙巖頭某板行有傭工二人貪食河豚肝中其毒頃刻而亡噫飲食之誤人如此事詳宵初僭樽兒送仲妹歸

書食河豚肝中毒事

飲食之受奇禍者莫如食河豚四月十七日南門外仙巖頭恒盛魚行獲一河豚甚巨傭取而剖之以其肝能毒人也將舉而投諸江主人不忍棄懸竿曝之意欲留此毒鼠旋被貓銜去墮某本行檐下適有某甲某乙者正鋸板陡見此物無因而至甲心疑之未敢取乙則不勝喜謂一塊紫肝天之所賜非人力致之遂取而切為膾合薑桂煮之沽酒邀甲對食贊其味之甘脆一

壺未罄而甲已癡若木雞問其故則謂下咽後小腹脹悶氣沖胸
膈喉間覺格格氣不續言甫畢竟踣地不省人事而斃乙轉瞬
間覩此形狀心大震慄亦憂毒發然已食不得出思用藥以救
之其時旁觀者甚衆或勸取石膏解之或勸用生尿化之乙聞
衆言遂急購石膏嚼下孰知甫嚼即大嘔惟吐白涎滿地彼見
藥無效轉用生尿而腹中之毒大發矣然猶健行數十步向廁
桶取尿數大盃張口肆喝計往返者二三次始覺足力漸倦初而
危坐繼則低頭疲困之餘猶回頭視甲淚泫泫下一若同病相
憐者閱片時許自言毒氣上升死必不免俄而面色大變雙目
漸瞑遊魂飄泊直到泉臺矣當斯時也兩人同時食河豚同

時中毒而死竟不同時何哉蓋乙方壯歲甲屆中年精力固不
同耳尤可異者主人婦方午炊亦就其熱釜治饌詎料餘毒未
消飯後竟如醉如癡幾蹈不測幸中毒尚輕解之即醒嗚呼險矣方
二人受困時非無業精岐黃者偶來過問對此暴症竟至束手豈
真無藥以救之乎抑斯人應登鬼錄而天心無可挽乎得之者奇食
之者奇而其死為尤奇誰實致之天耶命耶人耶冤耶古人云病從
口入斯言諒哉若甲與乙因口腹之貪蹈殺身之禍世有得儻來之
物逞快一時者尚其舉此為殷鑒也夫

十八日戊寅晴到館改課擬作佞佛說為乙班課本宵李乃文表佳
往裕姓魚行樓上觀劇係品玉班脚色整齊衣袍鮮耀頗覺出眾家

梅仙葉雲村孫生錢賓均在者至二鼓是夕演屠狗記傳奇本沈大沈
鏞故事被外人離間以兄虐弟以妻勸夫節義一門觀之足以起頑而立
懦已其詳其諸記中附成七言四絕

倭佛說

嗚呼人之好求佛者何其愚也日日到寺焚香拜禱固無益也夫
佛一土偶耳枯朽無靈豈有禍福致人之術設筵以求福佛固不知叩頭
以免禍佛亦不佑彼既不知又不能佑人攜香花而殷供養適貽君
子之笑柄矣在惡人行險欲資求以免禍佛即有靈亦不見佑况佛
而并無其靈矣倭何為哉孔子曰敬鬼神而遠之又曰未能事神馮
能事鬼聖言如此可不知所戒歟

觀劇有感

有序

屠狗記院本叙沈大沈鏞兄弟遺事其時代與里居均未之詳
沈氏昆仲身列儒林而家素裕大性嗜酒不慎擇交有甲乙
某無賴之流也大與之友稱莫逆交利其多金因大好酒日
導以飲必醉而後已復見其柔懦可欺也時構蜚語離間
其弟大深信而逐鏞又向鏞讒大并勸其鳴官析產自立門
戶鏞不為動然大自逐鏞後日在醉鄉朝出暮返二人必相隨
一日天寒雪甚甲乙扶大將送之歸至中途推大于地醉倒雪
中鏞偶過之見兄僵卧即背負還家嫂氏感其義留酒飯大
醒妻舉以告大召鏞而反撻之且責其存心不良竊去身畔
之藏銀也先是大與甲乙至肆沽飲有以玉杯求售者二人暗與

之約欲以分肥故昂其價杯固贖物大不辨遽易以十餘金餘
金猶藏袖中及玉山頽倒被二人攫去大之撻鏞責鏞蓋以此
也妻某氏賢而且智屢見其夫與鏞失睦都由甲乙二人思有以
絕之乃購黑犬刳其首穿以人衣虛掩後門橫屍當戶一似人之
被刺而倒地者大至暮醉歸見前門下鑰轉向後門而入質買來
前不之防為死犬所絆衣污于血心甚倉皇其妻給以人命攸關乘
此夜靜無人知覺當邀甲乙來設計蓋藏以免後禍大遂出門訪
之告以所遇二人均諉病不往大乃喪氣而返妻曰以甲乙之密
飲食與俱今竟聞難不赴何為離親而重友乎叔係手足必
能為我分憂宜邀叔共議不得已與妻偕往鏞不辭往負

而癡諸野鏞當黑夜亦不辨大與人也翌日甲乙來大絕之不
納心忿鳴公欲以傾大邑宰提兩造質訊鏞恐累兄托以被大
見逐殺人陷兄自認其嫂聞之至公庭直訴所殺者狗特借此以
警夫如其不信大屍猶在宰乃遣隸按驗果如所言於是賢其
妻而杖甲乙其案始了嗚呼賢哉此婦也沈大愚闇比暱惡友視
兄弟如寇讎苟無賢助借端規戒其得禍豈淺鮮哉諺云妻賢
夫禍少不其信夫余觀此劇有裨風教因泐筆記之系四絕
句于後

須防浸潤進讒言顛倒親疎歎寡恩煮豆燃萁忍相逼一
家骨肉本同根 死生枉說訂知交酒食徵朋半斗筭急

難相扶惟手足豈真異姓勝同胞 賢哉佳婦切規箴能使
良人作悔心列女傳中應補錄鬚眉巾幗少知音 風化攸關
挽豈難借將優孟演登壇興觀羣怨詩人肯鑒古懲今一例者
十九日己卯晴到館閱著作林內子自母家歸暮少雨宵與張震
軒趙羽儀李麗生三妹丈坐談頗久閱日報
二十日庚辰晨雨旋晴夕復雨到館宵全吳丹臣伯屏周曉秋眉
仙彭耀卿伍襄羣姜文初往姜岳仙家飲因姜君有卜遷之喜
也席散而歸閱日報

廿一日辛巳陰到館福潤局送到日報得杭城李蔚文表侄
書已知考入巡警名居優等午後將中笙先生李麗生妹丈

來訪因鍾文表侄在北京譯學館覆試不在列選余代作一札
托孫子珍向電局發碼欲其暫留京津也

子珍先生閣下舍任公任本日本有信自北京寄到謂近在譯學大有變動意欲南旋弟恐其少年志氣不顧前功迅速言歸實所不免敢懇閣下向電局照所擬數字先發電碼到京阻之使舍任暫留以便另籌地步至電費一切代為一付勞費清神另容函謝手肅順叩財安
如有回電不必專駕專差送下祈向德昌處邀曹君一譯寄下

廿二日壬午雨在館聞周湖趙壽仁之女與某有染非一日矣昨日
以酒醉其夫殺之沈屍于河夫弟告發已提押在署噫風俗日偷
竟如此也事詳記中薄暮曾定甫來還夜飲為令愛納采誌喜全席
李仲谷麗生也

廿三日癸未小雨在館洪棟園師送到著作林第十一冊溫數學命

分薄暮過李彬臣表兄家一談宵閱著作林

廿四日甲申雨在館聞趙阿嬌之女姁夫已被獲強狼就縛我心為之一快宵閱名文珠璣集終宵綿雨滴不絕聲

書周湖趙氏謀夫事

居室之變莫甚于婦之殺夫因姁謀斃其夫罪尤不容於死周湖趙氏阿嬌壽仁之女也年十七嫁與胡壽浩之次子三媪為室結褵已二載矣三媪農家子性粗莽趙氏自嫌非偶有不屑與之倡隨者鄰居陳保喜游蕩子也曾供信局之奔走暇日時過其家趙氏既薄其夫見喜能達常注目之野花陌上未免有情然猶秘而未露也嬌之母水性楊花夙有淫行三媪屢道其隱今見女不安于室愬其

婿劣心憾之欲議離婚壽仁性懦亦聽之喜逆得其情因阿嬌在其母家間相過從仁妻有心於喜故疎防範任與其女為亂且謂之曰苟能圖胡婿我必以女妻之阿嬌流連母家將屆半載三媪屢促之歸丈母頗厭之一日復往遂語侵及丈母某氏記前憾初而詬詈繼則鞭撻終以纏腳之布凌辱之彼見勢惡含忍而去鄰人不直其所為喻以正論不得已送還胡家然殺婿之念固無刻或忘此猶客歲事也今春二月阿嬌又賦歸甯喜常來叙舊母女暗與喜約謀所以死之間一月嬌忽返夫婦之間頗和睦三媪見妻改顏服從心甚安之而不知阿嬌之用心險也四月二十日三媪從事耕耨疲勞過甚阿嬌竊喜得閒薄暮預邀保喜入室探伏

床下以伺之三媼自田間歸嬌迎之婉言備至旋殺雞煖酒並坐對酌三媼量本不宏數杯即醉嬌乃扶掖就榻夜過半呼喜出抽捲被褥并去床板取繩堅網其手與足復用竹棍扼其喉被左此右猛力壓下三媼雖壯身已受縛加以大醉直如雞置釜湯奄然就死而已二人心恐復蘇更取紡車上鐵錠刺傷一目又穿透其左額角始畢命當其下手也喜之父聞聲驚起欲出探視後寂然遂中止蓋胡陳兩家居屋所隔者僅十餘步耳其同居之兄二媼業併有事赴鄉故亦不及救保喜阿嬌既謀死三媼欲乘深夜求掩其跡思及家有替船可載遂自牆拖出其屍駕舟而南抵十八家用巨石壓而沈之時河干有結伴網魚

者於殘月朦朧中見刺舟而過俄聞水聲澎湃驚問何為喜含糊以淘水答屍既沈後轉以船泊岸取所攜之糞桶及杓布置田畔一似三媼失足而落水者作為後日證據既畢事仍到阿嬌處相叙天明乃去日晡其兄二媼自鄉中歸聞鄰人言之眈眈心頗驚疑又以弟傍晚不歸詰諸阿嬌不吐出門密探與捕魚者遇即以昨夜痕迹之可疑告翌日二媼跡尋原處於河畔求之竟獲其屍于是指名喊控并扭阿嬌送縣陳子祥大令立即飭役提喜喜早遁坐堂畧問數語按驗屍身畢阿嬌發押閱二日後獲喜于上碼某家嚴刑訊鞠男女未得實供經再三提問始吐實喜之對簿也牽涉嬌之母此事實實伊指使之仁妻恐累

及身聞風先避聞陳令之如夫人愛憐阿嬌年少招入內宅密授
己意須諉以年弱無知謀死親夫均出喜手當堂作答似此覆
供或者得本官仁慈避重就輕未可知也蓋陳令之妾曾在申
江賣娼故有同病相憐之語諺云惺惺惜惺惺此之謂矣嗚呼男
女居室人之大倫也相親相愛分所當然趙家母女賣姦引姦行同
禽獸豈所謂人盡夫也欲援雍姬之母之訓而訓其女乎佳耦竟成
怨耦雖曰阿嬌致之實保喜致之非僅保喜致之實嬌之母先為
導引而致之也嬌喜二人宜梟其首某氏之罪尤難姑容春秋之
律亂臣賊子人人得而誅之甚願賢有司革正風俗不事曲恕施
以大辟榜之通衢儆一懲百庶有瘳乎

廿五日乙酉雨勢極大早晨

向木來作月老取蕙女庚甲與

董志謙明經之嗣君原復作合志謙與余故交倘天假之緣亦
一美事也在館溫命分祿法薄暮張君選闈過訪宵悶雨無聊伏
枕頗早榆兒感風不適呱呱而泣中夜輾轉遂不成眠

廿六日丙戌朝雨夕晴到館課諸生溫積熟出文課宵過李玉君
表第家一談

廿七日丁亥晴芒種節風日清和似仲春天氣朝往毅武女校授甲乙

二班國文夕出甲班文題

論女子之品格

薄暮過中學堂與張震軒妹

丈一談宵往李玉君表第家坐話頗久轉至承天宮觀劇

廿八日戊子朝晴到館改女學課卷夕雨改館課聞薛里某

婦以藥毒斃姦夫其家鳴於官事竟反坐具詳宵初習祿悶
雨伏枕頗早

記薛里某婦

二十七日薛里某氏婦有以藥毒斃姦夫者洵一奇聞也女姦夫某甲某村人性甚凶很險惡如虎一村畏之艷某氏色時過其家又欺其夫懦逼姦之有數年矣然某婦失節迫于強暴心非所甘也近以周湖謀夫事發復見某甲强悍乘隙圖夫恐蹈覆轍思有以懲後一日某甲來詐與約曰予與君為野鴛鴦不能長相叙須毒死拙夫始賦白首後日俟君來當設小點二盃一粗一細以作標識粗碗置毒細則無之君其勉行後數日某甲復來其夫亦

在座談次出小點款待其夫暗受婦囑取其粗者食之甲取細盃以食某婦背地相易而甲不知也少頃還甲附耳謂之曰今者我下藥殺夫倘毒一發子在我家耳目難掩子暫還家我夫即斃人或以暴死信之不幸見疑我當子身受之甲是其言遂歸至夜某甲毒發輾轉床褥頃刻而亡臨死謂其母曰我與某婦有染已非一日不意購藥毒我忍哉某氏也我死後當鳴官指控苟婦罪相抵死亦瞑目明日甲母如其言喊告官即飭提某氏及甲母某氏盡舉前情以對官判之曰汝子姦人之妻罪不能避又欲死人之夫忍心害理實為天地所不容且其死在家中與某婦無涉汝之子不肖生不能教訓死又遂其過有何面目為人之母乎我

不汝責怨汝年老耳某婦則受慰藉數語案遂結噫此婦也始則因強而忍辱繼則設計以除姦破鏡重圓雞鳴告警賢而且智與私相淫奔者高下不啻天淵孔子曰人之過也各於其黨觀過斯知仁矣若某氏婦者固未可一例論已

廿九日己丑雨到館代李麗生表弟作書覆其侄公任宵習算

鍾文賢任

青及

廿一日接閱來函備知近日北京譯學大為變動

有岌岌不可終日之勢姪之難乎為繼豈與當事者偶有齟齬乎抑觸犯堂規而居屏退之列乎否則非有齟齬非犯堂規或者未進苞苴受人讒間數者之中必居一於此矣屹屹神京堂堂大學諸公辦事有初鮮終京師如此直省可知大學如此小學

可知比之科舉時代其腐敗特有甚焉者賢侄自前年仲冬束裝赴杭順途往北投考浙學旋入譯學光陰彈指已歷年餘統計學費膳費諸項開消為數甚鉅一旦遭逢不偶麾之使去從前培植付諸東流負負之呼其曷能已來函云此次被屏與其留京自修虛糜歲月不如先行回里再作商量如侄所言胸中早有成竹矣然以余之主見欲令賢侄暫駐燕京靜候月餘別謀地位刻下陳介石太夫子在粵提倡學務於教育一家大得名譽又素性質直最喜提拔他人况與吾家有葭莩之誼余特修書叙明原因向介師處直接彼見賢侄失所定必加意見憐而一枝許借俟得機會可以束裝赴粵遵道而南省

却一番周折也當此囊金告罄裘敝黑貂返轡言旋恐俗人見蘇
季子書十上而不售適滋姍笑故知躁急不可遲緩尤不可古人
云善自為謀願姪守此言以定趨向免致歧路亡羊貽厥後悔始
為可也前因此事開輪期促不及作覆詳叙惟向溫電局先發
電碼囑任緩行至今未得回電豈憤懣未平而無遑及此乎念
念家中大小均平康毋須遠塵專此佈達順問近好

再本日接到來札謂店事一切已遷諸親戚議分而復合但此事非一朝一夕
所能定愚本意力扶大局其如汝伯不明道理何成與不成聽諸天也附托介
師一函未知粵東學堂何名所寓何處接此正時囑任填明信函寓居交郵
寄粵方不誤也又筆

三十日庚寅晴到館代李麗生作書寄陳介石主政為其任公任
托謀安插地步也宵習示

寄陳夫子大人 鈞座 未拜芝顏時深翹企比維門牆英萃鐸教

宏宣為頌為祝敬啓者 舍侄 去年得承夫子庇蔭取入譯學

按班受課四閱月矣本年季春忽起風波復加甄別新生經
淘汰者計四十餘名 舍姪 適當其列聞之學部為經費不敷

刻意求新將學生減數監督欲保全位置迎合之下而設
法折磨京師學界考選生徒似此舉棋不定公不勝私無

怪有心求學者每向隅而歎矣 晚 家產平常藉商餬口

祇為 舍侄 求學之故勉集川貨許其北遊接濟年餘冀得

成效奈石九風迅見阻于中途竟蹈書空前功盡棄恐長

安返轡適貽金盡貂敝之譏回首江東羞見父老將何以處

之刻下夫子駐旌南越山斗望隆化雨春風羣沾廣被昌
黎以後惟公一人意欲遣舍姪去燕就粵親炙師門舍弟瀛
琳曾受教誨之恩再世通家在夫子必將厚其父者兼
厚其子且舍姪近遭失怙焚燹孤立疇與提攜諒夫子
於此一以世交一以新特當必加意垂憐而不我拒也矧暑
假在即或者得遇機緣考進貴堂附諸驥尾尤為美舉
如蒙不棄是否乞賜佳音以便專為趨向是所至感家中
大小均叨福庇便筆附聞臨穎神馳欲言不盡恭請鐸安
統希垂鑒

五月朔日辛卯晴朝到館代李麗生作書覆其侄蔚文福潤局送到

日報夕在家楷書三封手札交郵遞寄一天津一粵東一杭城均受
麗生之囑也薄暮過裕姓魚行兌換洋銀計英洋三元得小洋三十
四圓又貼水八文錢較之城內錢庄盈餘卅數中國園法不能一律一
城內外尚見參差其他可知其腐敗甚矣順途過姚子琪門人家聞
其自杭返瑞已二日矣出枇杷露一杯以餉余甘美沁齒談久別歸嘗
在李王君表弟處暢談至三鼓

與蔚文書

廿一日接閱來信知侄投考巡警位次其亞聞聲之下

心為一快但願努力自愛專心向學不負初心斯為望耳應用諸
費已向汝父說明預備寄出毋勞過慮前函詢及酒捐辦事之
張君實名正珊為時已久可否宜衷一是可行則行不可行姑為

置之而已至行帖一節此事辦得平安其中不無微潤任倘與
當事者通氣不妨如裕泉等帖認領二三張於暑假回里時將
帖交與其行諸行家得此佳音必陸續而來託領多多益善
或可得利市三倍矣姪其留意可也小竹表伯囑購時式摺扇
金葉并骨一副兼托索名手書之即日寄下價值若干開明
便繳汝弟公任為譯學覆考竟遭退班可憾之至餘言難罄
專此佈覆順詢近好

二日壬辰晴到館近午邀管仲凌往惜字局收買字紙作書寄
杭省與李蔚文表侄夕館主人孫桐軒遣伴送到修脯英銀二
十五元紙券五元湊足卅元之數照客冬關約上半年三十七數

尚短七圓余涉見之中心悻悻直謂王戎復生貪婪無厭實可鄙
也隨過李麗生妹丈訴知并邀曾定甫先生調停其事至暮遂
湊足銀數而紙券交還曾君也余恨始平宵過李妹家一談

與李蔚文表侄

前接來札知賢侄投考巡警一戰獲勝從此吐氣揚眉激昂青
雲可為預賀所歉者令弟公任自去歲應試譯學幸藉同鄉諸
公之力加意扶持得登堂陞隨班受課四閱月矣近聞學部
以經費不敷與譯學之監督員章一山先生大相齟齬深恐舊
冬考取生徒為數太濫以強迫之手段龔陶鑄之虛聲任意折
磨刻減額數以故今歲二月爰借甄別而新生被汰者計四十餘

名公任亦在其列竊怪京師為首善之區魏魏公學創定初基
如此徇私如此腐敗他何足論夫寒素之家無多蓄積為其文兄
勉集多金使子弟負笈遠遊原冀得借一枝以厥後效乃神山
將近旋被引回殊令有心求學者目為畏途伊誰之過際此學界
新開動曰求實效進文明名不副實粉飾外觀其奈之何諸公
衮衮祇解皮毛舉世滔滔疇為砥柱有心人緬懷科舉時代謂其今
不如古良有以也學堂學堂隨波逐流濫竿日衆莫問前途吾知
國未亡而其文先亡人未死而其心已死雖有善者欲為挽救不其難
乎任任被遺前車宜鑒我為一人惜我并為同人懼也但願賢任
乘此盛年努力自愛專心向學獨具輓轡毋貽後悔始為可耳

鄙人跽伏蓬門拘守舊學自知所言不倫適招姍笑然身經閱歷有
激而談亦知我者所共諒賢任以為何如宋紫樞門人在并目學堂
計有年餘畢業在何學期未知近得相晤否念念姚生子琪已返
柿回里至姪家店業一節刻已定議一門荆樹同氣連枝共事扶持
以承先德可無遠注家慈以次均平康附筆告知暑期不遠餘俟面
譚此覆併問近佳

三日癸巳朝晴在家解拆諸賬夕全周曉秋眉仙吳丹臣伯屏姜文初
嶽仙往胡仲玉先生家收取柴業捐款約以晚間交付十金談頃冒雨
返申後訪孫季芃遇其侄延曙茶話之間謂國粹學報于朔日已送
至館中余以未收對即遣阿喜取還計二冊坐談至暮轉過孫經畬

處繳交書價迨歸已上燈時候宵閱日報

四日甲午天早晴旋雨在家解付諸賬改夏家鼎課卷簿暮訪季卿族弟前囑抄東嘉文徵已畢工袖歸宵閱日報

五日乙未天早晴已刻少雨過悟真寺訪慶慧和尚坐談甚久午刻書雄黃字以辟邪氣循鄉俗也夕改夏家鼎課卷宵在李祥菊家飲節酒歸閱日報

六日丙申晴朝閱日報午刻在李麗生表弟家飲節酒夕府委鄭

大令來勘視城工以驗紳士前日所控工書之虛實洪棟園師集同人詣場所迎候鄭令履勘余亦與焉是日到會者王嘯牧大令項申甫進士王玉侯胡李淑梅孝廉鮑漱泉家幼卿王楨叔劉純村明經池寅三先

生陳子祥邑尊亦到會隨委驗勘并召工房方暨匠人甲乙某問話

匠人謂工程浩大為淫雨故旋收修而旋破壞所領修費計三百五十元之數工房並無剋扣此皆受方之愚也眾人聽之咸為不平謂此數中有前修款六十元已有報銷証據工房從中移抵而石匠甘受指揮欲使匠人直言不諱勢無如何也且陳令意多偏袒反怒吾輩之多事噫官貪吏狡上下相蒙世局至此尚忍言哉薄暮袖課卷還夏家鼎過其家遇周眉仙宵習祿

七日丁酉晴旋陰天早代李麗生作書寄公任任已刻買舟全盧光榮往丁田近午抵妹家始知妹于端陽日舉一男今日適值三朝并為道賀聞此子墮地時恰當五日午時且狀貌魁偉聲音宏亮其為

英物無疑古人如田文曾于此日誕生為齊貴族位至將相兒之生同日將來建功立業未可量也午餐後攜窩窰窰三甥泛舟泊峽口觀龍舟日暮鼓櫂而歸宵閱日報夜雷雨

鍾文賢侄

初六日接到來函悉知賢侄有束裝回鄉之意

而徐班侯老伯則多情留侄章一山先生又囑徐關照并有六月招考德文來為取錄之說此事若固有之得仍舊貫比之遠赴廣東別圖地位較勝一籌賢侄當努力向前毋得遲緩收殘餘燼背城一戰敗軍之將復為錄用不其幸乎如其不然宜從前言轉轅南越趨謁介師巢借一枝亦未為失也侄以為何如初一覆札內附介公一函直囑蔣黼翰君轉致如接到時幸勿被人看見倘

得招考德文實信仍留行篋什襲藏之以為後日備可也此問近佳

八日戊戌雨午刻稍放晴光陰雲復合到館閱血史宵演習小公倍數九日己亥雨到館

十日庚子雨到館午刻往孫經畬公子家購來陳棧所演洋裝數術二冊宵初袖書訪姚子琪門人贈之研究祕數至二鼓歸

十一日辛丑阻雨不到館朝與李麗生趙羽儀二妹丈坐話夕在書室披閱日報薄暮稍有晴意宵仍閱報

十二日壬寅雨夏至節天早寫武帝誕祭分胙票到館宵與各屠戶結算分肉賬寫祀武帝祭章是夜官僚致祭關聖遣梓兒偕田坤祥到廟陳設豆品

十三日癸卯陰到館福潤局送到日報薄暮家慈乘轎往趙羽儀妹夫
家宵習祿

十四日甲辰陰雨朝到館夕往西北平糶局與諸同事發給各貧戶糶米
手摺至暮始歸宵閱報

十五日乙巳陰西北開平糶公局管汝姪脅眾到局滋鬧余以分居同事之
列雖非值年亦當與之分謗

公

下

通

[Faint bleed-through handwriting from the reverse side of the page]

[Faint, illegible handwritten text in a cursive script, likely a historical document or manuscript.]

運 河 記 序

